

欽定宋史

卷一
之五

宋史卷一

元中書右丞相總裁脫脫等修

本紀第一

太祖一

太祖啓運立極英武睿文神德聖功至明大孝皇帝諱
匡胤姓趙氏涿郡人也高祖眇是爲僖祖仕唐歷永清
文安幽都令眇生珽是爲順祖歷藩鎮從事累官兼御
史中丞珽生敬是爲翼祖歷營蓊涿三州刺史敬生弘
殷是爲宣祖周顯德中宣祖貴贈敬左驍騎衛上將軍
宣祖少驍勇善騎射事趙王王鎔爲鎔將五百騎援唐

莊宗于河上有功莊宗愛其勇留典禁軍漢乾祐中討
王景於鳳翔會蜀兵來援戰于陳倉始合矢集左目氣
彌盛奮擊大敗之以功遷護聖都指揮使周廣順末改
鐵騎第一軍都指揮使轉右廂都指揮領岳州防禦使
從征淮南前軍却吳人來乘宣祖邀擊敗之顯德三年
督軍平揚州與世宗會壽春壽春賣餅家餅薄小世宗
怒執十餘輩將誅之宣祖固諫得釋累官檢校司徒天
水縣男與太祖分典禁兵一時榮之卒贈武清軍節度
使太尉太祖宣祖仲子也母杜氏後唐天成二年生於
洛陽夾馬營赤光繞室異香經宿不散體有金色三日

不變既長容貌雄偉器度豁如識者知其非常人學騎射輒出人上嘗試惡馬不施銜勒馬逸上城斜道額觸門楣墜地人以爲首必碎太祖徐起更追馬騰上一無所傷又嘗與韓令坤博士室中雀鬪戶外因競起掩雀而室隨壞漢初漫遊無所遇舍襄陽僧寺有老僧善術數顧曰吾厚贖汝北往則有遇矣會周祖以樞密使征李守真應募居帳下廣順初補東西班行首拜滑州副指揮世宗尹京轉開封府馬直軍使世宗卽位復典禁兵北漢來寇世宗率師禦之戰于高平將合指揮樊愛能等先遁軍危太祖麾同列馳馬衝其鋒漢兵大潰乘

勝攻河東城焚其門左臂中流矢世宗止之還拜殿前
都虞候領嚴州刺史三年春從征淮南首敗萬衆于渦
口斬兵馬何延錫等南唐節度皇甫暉姚鳳衆號十五
萬塞清流關擊走之追至城下暉曰人各爲其主願成
列以決勝負太祖笑而許之暉整陣出太祖擁馬項直
入手刃暉中腦并姚鳳禽之宣祖率兵夜半至城下傳
呼開門太祖曰父子固親啓閉王事也詰旦乃得入韓
令坤平揚州南唐來援令坤議退世宗命太祖率兵二
千趨六合太祖下令曰揚州兵敢有過六合者斷其足
令坤始固守太祖尋敗齊王景達于六合東斬首萬餘

級還拜殿前都指揮使尋拜定國軍節度使四年春從
征壽春拔連珠砦遂下壽州還拜義成軍節度檢校太
保仍殿前都指揮使冬從征濠泗爲前鋒時南唐砦于
十八里灘世宗方議以橐駝濟師而太祖獨躍馬截流
先渡麾下騎隨之遂破其砦因其戰艦乘勝攻泗州下
之南唐屯清口太祖從世宗翼淮東下夜追至山陽俘
唐節度使陳承詔以獻遂拔楚州進破唐人于濳江口
直抵南岸焚其營柵又破之于瓜步淮南平唐主畏太
祖威名用間於世宗遣使遺太祖書餽白金三千兩太
祖悉輸之內府間乃不行五年改忠武軍節度使六年

世宗北征爲水陸都部署及莫州先至瓦橋關降其守將姚內斌戰却數千騎關南平世宗在道閱四方文書得韋囊中有木三尺餘題云點檢作天子異之時張承德爲點檢世宗不豫還京師拜太祖檢校太傅殿前都點檢以代承德恭帝卽位改歸德軍節度檢校太尉七年春北漢結契丹入寇命出師禦之次陳橋驛軍中知星者苗訓引門吏楚昭輔視日下復有一日黑光摩盪者久之夜五鼓軍士集驛門宣言策點檢爲天子或止之衆不聽遲明逼寢所太宗入白太祖起諸校露刃列于庭曰諸軍無主願策太尉爲天子未及對有以黃衣

加太祖身衆皆羅拜呼萬歲卽掖太祖乘馬太祖攬轡
謂諸將曰我有號令爾能從乎皆下馬曰唯命太祖曰
太后主上吾皆北面事之汝輩不得驚犯大臣皆我比
肩不得侵凌朝廷府庫士庶之家不得侵掠用令有重
賞違卽孥戮汝諸將皆載拜肅隊以入副都指揮使韓
通謀禦之王彥昇遽殺通於其第太祖進登明德門令
甲士歸營乃退居公署有頃諸將擁宰相范質等至太
祖見之嗚咽流涕曰違負天地今至于此質等未及對
列校羅彥瓌按劔厲聲謂質等曰我輩無主今日須得
天子質等相顧計無從出乃降階列拜召文武百僚至

輔班定翰林承旨陶穀出周恭帝禪位制書于袖中宣
徽使引太祖就庭北面拜受已乃掖太祖升崇元殿服
袞冕卽皇帝位遷恭帝及符后于西宮易其帝號曰鄭
王而尊符后爲周太后

建隆元年春正月乙巳大赦改元定有天下之號曰宋
賜內外百官軍士爵賞貶降者敘復流配者釋放父母
該恩者封贈遣使偏告郡國丙午詔諭諸鎮將帥戊申
賜書南唐贈韓通中書令命以禮收葬己酉遣官告祭
天地社稷復安州華州兗州爲節度辛亥論翊戴功以
周義成軍節度使殿前都指揮使石守信爲歸德軍節

度使侍衛親軍馬步軍副都指揮使江寧軍節度使侍
衛親軍馬軍都指揮使高懷德爲義成軍節度使殿前
副都點檢武信軍節度使侍衛親軍步軍都指揮使張
令鐸爲鎮安軍節度使侍衛親軍馬步軍都虞候殿前
都虞候王審琦爲泰寧軍節度使殿前都指揮使虎捷
右廂都虞候張光翰爲江寧軍節度使侍衛親軍馬軍
都指揮使龍捷右廂都指揮使趙彥徽爲武信軍節度
使其餘領軍者並進爵王子賜宰相樞密諸軍校襲衣
犀玉帶鞍馬有差癸丑放南唐降將周成等歸國乙卯
遣使分振諸州丁巳命周宗正郭玘祀周陵廟仍以時

祭享己未宰相表請以二月十六日爲長春節癸亥以
周天雄軍節度使魏王符彥卿守太師雄武軍節度使
王景守太保太原郡王定難軍節度使守太傅西平王
李彝殷守太尉荆南節度使高保融守太傅餘領節鎮
者並進爵甲子賜皇弟殿前都虞候匡義名光義己巳
立太廟鎮州郭崇報契丹與北漢軍皆遁二月乙亥尊
母南陽郡夫人杜氏爲皇太后以周宰相范質依前守
司徒兼侍中王溥守司空兼門下侍郎同中書門下平
章事魏仁浦爲尚書右僕射兼中書侍郎同中書門下
平章事樞密使吳廷祚同中書門下二品丙戌長春節

賜羣臣衣各一襲三月乙巳改天下郡縣之犯御名廟諱者丙辰南唐王李景吳越王錢俶遣使以御服錦綺金帛來賀宿州火遣使恤災壬戌定國運以火德王色尚赤臘用戊癸亥命武勝軍節度使宋延渥等率舟師巡江徼是春均房商洛鼠食苗夏四月癸酉竇儼上二舞十二樂曲名樂章乙酉幸玉津園遣使分詣京城門賜饑民粥丙戌浚蔡河癸巳昭義軍節度使李筠叛遣歸德軍節度使石守信討之五月己亥朔日有食之庚子遣昭化軍節度使慕容延釗彰德軍節度使王全斌將兵出東道與守信會討李筠壬寅竇儼上太廟舞曲

名癸卯石守信敗李筠于長平甲辰命諸道進討丙午
幸魏仁浦第視疾己酉西京作周六廟成遣官奉遷丁
巳詔親征以樞密使吳廷祚留守上都都虞候光義爲
大內都點檢命天平軍節度使韓令坤屯兵河陽己未
發京師丁卯石守信高懷德破筠衆于澤州禽僞節度
范守圖殺北漢援兵之降者數千人筠遁入澤州戊辰
王師圍之六月癸酉有星赤色出心辛未拔澤州筠赴
火死命理齒幣釋河東相魏融禁剽掠甲申免澤州今
年租有星赤色出太微垣歷上相乙酉伐上黨丁亥筠
子守節以城降赦之上如潞辛卯大赦減死罪免附潞

三十里今年租錄陣歿將校子孫丁夫給復三年甲午
永安軍節度使折德展破北漢沙谷砦秋七月戊申上
至自潞壬子幸范質第視疾甲子遣工部侍郎艾穎拜
嵩慶陵乙丑南唐進白金賀平澤潞丁卯南唐進乘輿
御服物八月戊辰朔御崇元殿行入閣儀辛未遣郭玘
襲周廟壬申復貝州爲永清軍節度甲戌命宰相禱雨
辛巳以周武勝軍節度使侯章爲太子太師壬午以光
義領泰寧軍節度依前殿前都虞候甲申立琅琊郡夫
人王氏爲皇后戊子南唐進賀平澤潞金銀器羅綺以
千計九月壬寅昭義軍節度使李繼勳焚北漢平遙縣

癸卯三佛齊國遣使貢方物丙午奉玉冊諡高祖曰文
獻皇帝廟號僖祖高祖妣崔氏曰文懿皇后曾祖曰惠
元皇帝廟號順祖曾祖妣桑氏曰惠明皇后祖曰簡恭
皇帝廟號翼祖祖妣劉氏曰簡穆皇后皇考曰武昭皇
帝廟號宣祖己酉幸宜春苑中書舍人趙行逢坐從征
避難貶房州司戶參軍己未淮南節度李重進以揚州
叛遣石守信等討之甲子歸太原俘冬十月丁卯朔賜
內外文武官冬衣有差壬申定縣爲望繫上中下令三
年一注壬午河決厭次乙酉晉州兵馬鈐轄荆罕儒襲
北漢汾州死之龍捷指揮石進二十九人坐不救棄市

丁亥詔親征揚州以都虞候光義爲大內都部署樞密使吳廷祚權上都留守戊子詔諸道長貳有異政衆舉留請立碑者委參軍驗實以聞庚寅發京師十一月丁未師傅揚州城拔之重進盡室自焚戊申誅重進黨揚州平命諸軍習戰艦于迎鑾南唐主懼甚其臣社著薛良因詭迹來奔帝疾其不忠斬著下蜀市配良廬州牙校已酉振揚州城中民人米一斛十歲以下者半之脅隸爲軍者賜衣履遣還庚戌給攻城役夫死者人絹三匹復三年乙卯南唐主遣使來犒師庚申遣其子從鎰來朝十二月己巳駕還丁亥上至自揚辛卯泉州節度

使留從效稱藩

二年春正月丙申朔上詣太后宮門稱慶庚子占城國王遣使來朝壬寅幸造船務觀習水戰戊申以揚州行宮爲建隆寺太僕少卿王承哲坐舉官失實責授殿中丞壬子商州鼠食苗詔免賦謂宰臣曰比命使度田多邀功弊民當慎其選以見朕意丁巳導蔡水入潁己未遣郭玘饗周廟靈武節度使馮繼業獻馬五百橐駝百野馬十甲子澤州刺史張崇詒坐黨李重進棄市二月丙寅幸飛山閣閱礮車壬申疏五丈河癸酉有司奏進士合格者十一人荆南高保勗進黃金什器甲戌幸城

南觀修水置丁丑南唐進長春節御衣金帶及金銀器
己卯賜天雄軍節度符彥卿粟禁春夏捕魚射鳥己丑
定竊盜律三月丙申內酒坊火酒工死者三十餘人乘
火爲盜者五十人擒斬三十八人餘以宰臣諫獲免酒
坊使左承規副使田處巖以酒工爲盜坐棄市閏月己
巳幸玉津園謂侍臣曰沉湎非令儀朕宴偶醉恒悔之
壬辰南唐進謝賜生辰金器羅綺丁丑金商房三州饑
振之癸未幸迎春苑宴射夏四月癸巳朔日有食之壬
寅詔郡國置前代帝王賢臣陵冢戶己酉無棣男子趙
遇詐稱皇弟伏誅己未商河縣令李瑤坐贓杖死左贊

善大夫申文緯坐失覺察除籍庚申班私鍊貨易鹽及
貨造酒麴律五月癸亥朔以皇太后疾赦雜犯死罪己
下乙丑天狗墮西南丙寅三佛齊國來獻方物丁丑以
安邑解兩池鹽給徐宿鄆濟庚寅供奉官李繼昭坐盜
賣官船棄市詔諸道郵傳以軍卒遞六月甲午皇太后
崩于滋德殿己亥羣臣請聽政從之庚子以太后喪權
停時享辛丑見百官於紫宸殿門壬子祈雨庚申釋服
秋七月壬戌以皇太后殯不受朝辛未晉州神山縣谷
水泛出鐵方圓二丈三尺重七千斤壬申以光義爲開
封府尹光美行興元尹己卯隴州進黃鸚鵡八月壬辰

朔不視朝壬寅詔諸大辟送所屬州軍決判甲辰南唐
主李景死子煜嗣遣使請追尊帝號從之己酉執易定
節度使同平章事孫行友削官勒歸私第辛亥幸崇夏
寺觀脩三門女直國遣使來朝獻大名府永濟主簿郭
顛坐贓棄市庚申周世宗實錄成九月壬戌朔不御殿
南唐遣使來進金銀繒綵甲子契丹解利來降荆南節
度使高保勗遣其弟保寅來朝戊子遣使南唐賻祭冬
十月癸巳南唐遣其臣韓熙載田霖來會皇太后葬丙
申遣樞密承旨王仁贍賜南唐禮物戊戌禁邊民盜塞
外馬辛丑丹州大雨雹丙午葬明憲皇太后于安陵十

一月辛酉朔不視朝甲子太后祔廟己巳幸相國寺遂幸國子監癸酉沙州節度使曹元忠瓜州團練使曹延繼等遣使獻玉鞍勒馬十二月壬申回鶻可汗景瓊遣使來獻方物乙未李繼勳敗北漢軍俘遼州刺史傅廷彥弟勳來獻辛丑幸新修河倉庚戌畋于近郊癸丑遣使賜南唐吳越馬牛橐駝有差

三年春正月庚申朔以喪不受朝賀己巳淮南饑振之庚午幸迎春苑宴射甲戌廣皇城詔郡國長吏勸民播種丙子瓜沙歸義節度使曹元忠獻馬庚辰女直國遣使只骨來獻詔郡國不得役道路居民癸未幸國子監

二月丙辰復幸國子監遂如迎春苑宴從官庚寅詔文
班官舉堪爲賓佐令錄者各一人不當者比事連坐甲
午詔自今百官朝對須陳時政利病無以觸諱爲懼乙
未滑州節度使張建豐坐失火免官己亥更定竊盜律
壬午上謂侍臣曰朕欲武臣盡讀書以通治道何如左
右不知所對甲寅北漢寇潞晉守將擊走之三月戊午
朔厭次霽霜殺桑壬戌三佛齊國遣使來獻癸亥禱雨
丁卯幸太清觀遂幸開封尹後園宴射己巳大雨詔申
律文諭郡國犯大辟者刑部審覆乙亥遣使賜南唐主
生辰禮物丁丑女直國遣使來獻丁亥命徙北漢降人

于邢洛夏四月乙未延州大雨雪趙衛二州旱丙申寧
州大雨雪溝洫冰戊戌幸太清觀庚子回鶻阿督等來
獻方物壬寅丹州雪二尺乙巳贈兄光濟爲邕王弟光
贊爲夔王追冊夫人賀氏爲皇后五月甲子幸相國寺
禱雨遂幸迎春苑宴射乙亥海州火開太行運路癸未
命使檢諸州旱甲申詔均戶役敢蔽占者有罪復幸相
國寺禱雨乙酉廣大內齊博德相霸五州自春不雨以
旱減膳徹樂六月辛卯振宿州饑癸巳吳廷祚以雄武
軍節度使罷乙未賜酒國子監丁酉幸太清觀己亥減
京畿河北死罪以下壬寅京師雨壬子蕃部尚波于等

爭採造務以兵犯渭北知秦州高防禦走之乙卯幸迎春苑宴射黃陂縣有象自南來食稼秋七月庚申南唐遣其臣翟如璧謝賜生辰禮貢金銀錦綺千萬壬戌放南唐降卒弱者數千人歸國乙丑免舒州菰蒲新稅丁卯潞州大雨雹索內外軍不律者配沙門島己卯北漢捉生指揮使路貴等來降辛巳遣從臣十人檢河北旱癸未兗濟德磁洛五州蝻八月癸巳蔡河務綱官王訓等四人坐以糠土雜軍糧磔于市乙未用知制誥高錫言諸行賂獲薦者許告訐奴婢隣親能告者賞詔注諸道司法參軍皆以律疏試判詔尚書吏部舉書判拔萃

科九月庚午吐蕃尚波于等歸伏羌縣地壬申修武成
王廟丙子占城國來獻禁伐桑棗冬十月乙酉朔賜百
官冬服有差丙戌幸太清觀遂幸造船務觀習水戰己
亥幸岳臺命諸軍習騎射復幸玉津園辛丑以樞密副
使趙普爲樞密使辛亥畋近郊十一月癸亥禁奉使請
托縣令考課以戶口增減爲黜陟丙寅南唐遣其臣顧
彝來朝丙子三佛齊國遣使李麗林等來獻高麗國遣
李興祐等來朝己卯畋于近郊壬午賜南唐建隆四年
曆十二月丙戌詔縣置尉一員理盜訟置弓手視縣戶
爲差戊戌蒲晉慈隰相衛六州饑振之庚子班捕盜令

甲辰衡州刺史張文表叛是歲周鄭王出居房州

乾德元年春正月甲寅朔不御殿乙卯發關西鄉兵赴
慶州丁巳修畿內河隄己未遣使賜南唐吳越馬橐駝
羊有差庚申遣山南東道節度使慕容延釗率十州兵
以討張文表乙丑幸造船務觀造戰船甲戌詔荆南發
水卒三千應延釗于潭己卯女直國遣使來獻三月壬
辰周保權將楊師璠梟文表于朗陵市甲午慕容延釗
入荆南高繼沖請歸朝得州三縣十七乙未克潭州辛
亥澶滑衛魏晉絳蒲孟八州饑命發廩振之三月辛未
幸金鳳園習射七發皆中符彥卿等進馬稱賀乃徧賜

從臣名馬銀器有差壬申高繼冲籍其錢帛芻粟來上
癸酉班新定律戊寅慕容延釗破三江口下岳州克復
朗州湖南平得州十四監一縣六十六夏四月旱甲申
徧禱京城祠廟夕雨減荆南朗州潭州管内死罪一等
鹵掠者給主乙酉遣使祭南岳丁亥幸國子監遂幸武
成王廟宴射玉津園庚寅出內錢募諸軍子弟鑿習戰
池辛卯建隆應天曆成御製序壬辰賞湖南立功將士
癸巳幸玉津園丙申兵部郎中曹匪躬棄市海陵鹽城
屯田副使張藹除名並坐不法庚子荆南節度使高繼
冲進助宴金銀羅紈柱衣屏風等物癸卯辰錦敘等州

歸順甲辰詔疏鑿三門禁涇原邠慶等州補蕃人爲邊
鎮將夏西平王李彝興獻犛牛一乙巳幸玉津園閱諸
軍騎射丙午免湖南茶稅禁陝州鹽井辛亥貸澶州民
種食五月壬子朔禱雨京城甲寅遣使禱雨嶽瀆乙丑
廣大丙庚午給荆南管內符印癸酉幸玉津園六月乙
酉免潭州諸縣無名配斂壬辰暑罷營造賜工匠衫履
乙未詔荆南兵願歸農者聽丙申詔歷代帝王二年一
饗立漢光武唐太宗廟己亥澶濮曹絳蝗命以牢祭庚
子百官三上表請舉樂從之減左右仗千牛員丙午雨
詔蜡祀廟社皆用戊臘一日己酉命習水戰于新池秋

七月辛亥朔定州縣所置雜職承符廳子等名數甲寅
以湖湘歿王事靳彥朗男承勳等三十人補殿直丙寅
幸新池賜役夫錢遂幸玉津園丁巳安國軍節度使王
全斌等率兵入太原境以俘來獻給錢米以釋之己未
詔民有疾而親屬遺去者罪之癸亥湖南疫賜行營將
校藥丁卯幸武成王廟遂幸新池觀習水戰己巳朗州
賊將汪端寇州城都監尹重睿擊走之詔免荆南管內
夏稅之半甲戌釋周保權罪乙亥詔繕朗州城免其管
內夏稅丁丑分命近臣禱雨己卯班重定刑統等書八
月壬午殿前都虞候張瓊以陵侮軍校史珪石漢卿等

爲所誣譖下吏瓊自殺丙戌遣給事中劉載朝拜安陵
丁亥王全斌攻北漢樂平縣降之辛卯以樂平縣爲平
晉軍降卒千八百人爲效順軍人賜錢帛壬辰詔九經
舉人下第者再試癸巳女直國遣使獻名馬蠲登州沙
門島民稅令專治船渡馬丙申北漢靜陽十八砦首領
來降泉州陳洪進遣使來朝貢齊州河決京師雨己亥
契丹幽州岐溝關使柴廷翰等來降癸卯宰相質率百
官上尊號不允九月甲寅三上表請從之丙寅宴廣政
殿始用樂丁卯責宣徽南院使兼樞密副使李處耘爲
淄州刺史戊辰女直國遣使獻海東青名鷹丙子禁朝

臣公薦貢舉人賜南唐羊萬口磔汪端于朗州戊寅北漢引契丹兵攻平晉遣洛州防禦使郭進等救之冬十月庚辰詔州縣徵科置簿籍己亥畋近郊丁未吳越國王進郊祀禮金銀珠器犀象香藥皆萬計十一月乙卯荆南節度使高繼沖進郊祀銀萬兩甲子有事南郊大赦改元乾德百官奉玉冊上尊號曰應天廣運仁聖文武至德皇帝丙寅南唐進賀南郊尊號銀絹萬計丁卯賜近臣襲衣金帶器幣鞍馬有差乙亥畋近郊十二月庚辰殿前祇候李璘以父讐殺員僚陳友璘自首義而釋之辛巳開封府尹光義興元尹光美各益食邑賜功

臣號宰相質溥仁浦並特進易封益食邑樞密使普加
光祿大夫易功臣號文武臣僚各進階勳爵邑甲申皇
后王氏崩辛卯罷登州都督己亥泉州陳洪進遣使貢
白金千兩乳香茶藥皆萬計己巳南唐主上表乞呼名
詔不允閏月己酉朔校醫官黜其藝不精者二十二入
甲寅命近臣祈雪丁卯覆試拔萃科田可封宋白譚利
用等稱旨賜與有差辛未卜安陵于鞏縣乙亥折德辰
敗北漢軍于城下禽其將楊璘以太常議奉赤帝爲感
生帝

二年春正月辛巳諭郡國長吏勸農耕作有象入南陽

虞人殺之以齒革來獻京師雨雪雷癸未幸迎春苑宴射甲申詔著四時聽選式回鶻遣使獻方物戊子質以太子太傅溥以太子太保仁浦仍尚書左僕射罷庚寅以趙普爲門下侍郎同中書門下平章事李崇矩樞密使壬辰詔親試制舉三科不限官庶許直詣閣門進狀甲辰詔諸道獄詞令大理刑部檢詳或淹留差失致中書門下改正者重其罪乙巳幸玉津園宴射丁未詔縣令簿尉非公事毋至村落令錄簿尉諸職官有耄耄篤疾者舉劾之二月戊申朔北漢遼州刺史杜延韜以城來降癸丑遣使振陝州饑導淇水入京丁巳治安陵隧

壞役兵壓死者二百人命有司瘞恤庚午府州俘北漢

衛州刺史

闕

楊璘來獻甲戌南唐進改葬安陵銀綾絹

各萬計浚汴河三月辛巳幸教船池賜水軍將士衣有
差還幸玉津園宴射乙未北漢耀州團練使周審玉等
來降丁酉遣使祈雨于五嶽禁臣僚往來假官軍部送
辛丑遣攝太尉光義奉冊寶上明憲皇太后諡曰昭憲
皇后賀氏諡曰孝惠王氏諡曰孝明夏四月丁未朔策
賢良方正直言極諫科博州判官穎贄中第戊申振河
中饑己酉免諸道今年夏稅之無苗者乙卯葬昭憲皇
太后孝明皇后于安陵乙丑始置叅知政事以兵部侍

郎薛居正呂餘慶爲之己巳靈武饑轉涇粟以饗壬申
禘二后于別廟徙永州諸縣民之畜蠱者三百二十六
家于縣之僻處不得復齒於鄉五月己卯知制誥高錫
坐受藩鎮賂貶萊州司馬辛巳宗正卿趙礪坐贓杖除
籍癸未幸玉津園宴射六月己酉以光義爲中書令光
美同中書門下平章事子德昭貴州防禦使庚申宰相
國寺遂幸教船池玉津園辛未河南北及秦諸州蝗惟
趙州不食稼秋七月乙亥春州暴水溺民庚辰邵陽雨
雹辛巳幸玉津園還幸新池觀習水戰辛卯詔翰林學
士陶穀竇儀等舉堪爲藩郡通判者各一人不當者連

坐九月甲戌朔周易博士奚嶼責乾州司戶庫部員外
王貽孫責左贊善大夫並坐試任子不公戊子延州雨
雹乙未幸北郊觀稼辛丑太子太傅質薨壬寅潘美等
克郴州冬十月戊申周紀王熙謹薨報視朝十一月甲
戌命忠武軍節度使王全斌爲西川行營前軍兵馬都
部署武信軍節度崔彥進副之將步騎三萬出鳳州道
江寧軍節度使劉光義爲西川行營前軍兵馬都部署
樞密承旨曹彬副之將步騎二萬出歸州道以伐蜀乙
亥宴西川行營將校于崇德殿示川峽地圖授攻取方
畧賜金玉帶衣物各有差壬辰畋近郊十二月乙巳釋

廣南郴州都監陳瑁等二百人戊申劉光義拔夔州蜀
節度高彥儔自焚丁巳蜀歸峽秋稅辛酉王全斌克萬
仞燕子二砦下興州連拔石圖等二十餘砦甲子光義
拔巫山等砦斬蜀將南光海等八千級禽其戰權都指
揮袁德宏等千二百人全斌先鋒史進德敗蜀人于三
泉砦禽其節度使韓保正李進等南唐進銀二萬兩金
銀器皿數百事庚午詔招復山林聚匿辛未畋北郊

宋史卷一考證

太祖紀一建隆三年六月乙未賜酒國子監○

臣人龍

按宋會要建隆中凡三幸國子監謁文宣王廟

宋史卷一考證

宋史卷二

元中書右丞相總裁脫脫等修

本紀第二

太祖二

三年春正月癸酉朔以出師不御殿甲戌王全斌克劍門斬首萬餘級禽蜀樞密使王昭遠澤州節度趙崇韜乙亥詔瘞征蜀戰死士卒被傷者給繒帛壬午全斌取利州乙酉蜀王孟昶降得州四十五縣一百九十八戶五十三萬四千三十有九高麗國王遣使來朝獻戊子吏部郎中鄧守中坐試吏不當責本曹員外郎癸巳劉

光義取萬施開忠四州遂州守臣陳愈降乙未詔撫西
川將吏百姓丙申赦蜀歸俘獲除管內逋賦免夏稅及
沿徵物色之半二月癸卯南唐吳越進長春節御衣金
銀器錦綺以千計甲辰遣皇城使竇思儼迎勞孟昶丁
未全州大水庚申王全斌殺蜀降兵二萬七千人於成
都三月癸酉詔置義倉是月兩川賊羣起先鋒都指揮
使高彥暉死之詔所在攻討夏四月乙巳回鶻遣使獻
方物癸丑職方員外郎李岳坐贓棄市南唐進賀收蜀
銀絹以萬計戊午遣中使給蜀臣鞍馬車乘于江陵癸
亥募諸軍子弟導五丈河通皇城爲池五月辛未朔詔

還諸道幕職令錄經引對者以涉途遠近差減其選壬申幸迎春苑宴射乙亥遣開封尹光義勞孟昶於玉津園丙戌見孟昶於崇元殿宴昶等於大明殿丁亥賜將士衣服錢帛戊子大赦減死罪一等壬辰宴孟昶及其子弟於大明殿六月甲辰以孟昶爲中書令秦國公昶子弟諸臣錫爵有差庚戌孟昶薨秋七月珍州刺史田景遷內附壬辰追封孟昶爲楚王丁酉幸教船池遂幸玉津園宴射八月戊戌朔詔籍郡國驍勇兵送闕下癸卯河決陽武縣庚戌詔王全斌等廩蜀亡命兵士家乙卯河溢河陽壞民居戊午殿直成德鈞坐贓棄市己未

鄆州河水溢沒田辛酉壽星見九月己巳閱諸道兵以
騎軍爲驍雄步軍爲雄武並隸親軍壬申詔蜀諸郡各
置克寧軍五百人辛巳河決澶州戊子幸西水磴十月
丁酉朔大霧己未太子中舍王治坐受賊殺人棄市丙
寅濟水溢鄒平十一月丙子甘州回鶻可汗遣僧獻佛
牙寶器乙未劔州刺史張仁謙坐殺降貶宋州教練十
二月丁酉朔詔婦爲舅姑喪者齊斬己亥詔西川管内
監軍巡檢毋預州縣事戊午甘州回鶻可汗于闐國王
等遣使來朝進馬千匹橐駝五百頭玉五百圍琥珀五
百斤

四年春正月丙子遣使分詣江陵鳳翔賜蜀羣臣家錢帛丁亥命丁德裕等率兵巡撫西川己丑幸迎春苑宴射二月癸卯視皇城役丙辰于闐國王遣其子德從來獻安國軍節度使羅彥瓌等敗北漢於靜陽禽其將鹿英辛酉試下第舉人甲子免西川今年夏稅及諸徵之半田不得耕者盡除之岳州火三月癸酉罷義倉甲戌占城國遣使來獻癸未僧行勤等一百五十七人各賜錢三萬游西域夏四月丁酉占城遣使來獻丙午潭州火壬子罷光州貢鷹鷄丁巳契丹天德軍節度使于延超與其子來降進士李藹坐毀釋氏辭不遜黥杖配沙

門島庚申幸燕國長公主第視疾五月南唐賀文明殿
成進銀萬兩甲戌光祿少卿郭玘坐贓棄市乙亥閱蜀
法物圖書丁丑詔蜀郡敢有不省父母疾者罪之辛巳
潭州火壬午澶州進麥兩岐至六岐者百六十五本辛
卯熒惑犯軒轅六月甲午東阿河溢甲辰河決觀城月
犯心前星丙午澧州刺史白全紹坐縱紀綱規財部內
免官詔人臣家不得私養宦者內侍年三十以上方許
養一子士庶敢有鬪童男者不赦己酉果州貢禾一莖
十三穗秋七月丙寅詔蜀官將吏及姻屬疾者所在給
醫藥錢帛戊辰西南夷首領董暲等內附己巳幸造船

務又幸開封尹北園宴射癸酉賜西川行營將士錢帛
有差庚辰罷劔南蜀米麥征華州旱免今年租給州縣
官奉戶八月丁酉詔除蜀倍息庚子水壞高苑縣城壬
寅詔憲臣及吏刑部官三周歲滿日卽轉授加恩庚戌
樞密直學士馮瓚綾錦副使李美殿中侍御史李楫爲
宰相趙普陷以賊論死會赦流沙門島逢恩不還辛亥
幸玉津園宴射京兆府貢野蠶繭壬子衡州火乙卯錄
囚丙辰河決滑州壞靈河大隄普州免食稼閏月乙丑
河溢入南華縣己巳衡州火乙亥詔民能樹藝開墾者
不加征令佐能勸來者受賞九月壬辰朔水虎捷指揮

使孫進龍衛指揮使吳瓌等二十七人坐黨呂翰亂伏
誅夷進族庚子占城獻馴象乙巳幸教船池遂幸玉津
園觀衛士騎射丙午詔吳越立禹廟于會稽冬十月辛
酉朔命太常復二舞癸亥詔諸郡立古帝王陵廟置戶
有差已已禁吏卒以巡察擾民十二月庚辰妖人張龍
兒等二十四人伏誅夷龍兒李土楊密聶贊族

五年春正月戊戌治河隄丁未合州漢初縣上青樛木
中有文曰大連宋甲寅王全斌等坐伐蜀黥貨殺降全
斌責崇義軍節度使崔彥進責昭化軍節度使王仁贍
責右衛大將軍丙辰詔伐蜀將校有受蜀人錢物者並

卽還主丁巳賞伐蜀功曹彬劉光義等進爵有差二月
庚申朔幸造船務遂幸城西觀衛士騎射甲子薛居正
呂餘慶並爲吏部侍郎依前叅知政事己丑幸教船池
三月甲辰詔翰林學士常叅官於幕職州縣及京官內
各舉堪任常叅官者一人不當者連坐乙巳詔諸道舉
部內官吏才德優異者丙午以普爲尚書左僕射兼門
下侍郎同中書門下平章事崇矩檢校太傅是日幸教
船池又幸玉津園宴射丙辰北漢石盆砦招收指揮使
閻章以砦來降五星聚奎夏五月乙巳賜京城貧民衣
北漢鴻唐砦招收指揮使樊暉以砦來降甲寅王溥爲

太子太傅六月戊午朔日有食之辛巳幸建隆觀遂幸
飛龍院丁亥狎犴順化王子等來獻方物七月丁酉禁
毀銅佛像己酉免水旱災戶今年租八月甲申河溢入
衛州城民溺死者數百九月壬辰倉部員外郎陳郾坐
贓棄市甲午西南蕃順化王子部才等遣使獻方物己
酉畋近郊十一月乙酉朔工部侍郎母守素坐居喪娶
妾免供奉武仁海坐枉殺人棄市十二月丙辰禁新小
鐵蠟等錢疎惡布帛入粉藥者癸酉升麟州爲建寧軍
節度趙普以母憂去位丙子起復

開寶元年春正月甲午增治京城陝之集津絳之垣曲

懷之武陟饑振之己亥北漢偏城砦招收指揮使任恩等來降三月庚寅班縣令尉捕盜令癸巳幸玉津園乙巳有馴象自至京師夏四月乙卯幸節度使趙彥徽第視疾五月丁未賜南唐米麥十萬斛六月癸丑朔詔民田爲霖雨河水壞者免今年夏稅及沿徵物癸亥詔荆蜀民祖父母父母在者子孫不得別財異居丁丑太白晝見戊寅復見辛巳龍出單父民家井中大風雨漂民舍四百區死者數十人秋七月丙申幸鐵騎營賜軍錢羊酒有差北漢潁州砦主胡遇等來降丙午幸鐵騎營遂幸玉津園戊申坊州刺史李懷節坐強市部民物責

左衛率府率北漢主劉鈞卒養子繼恩立八月乙卯按
鵠于近郊還幸相國寺戊午又按鵠于北郊還幸飛龍
院丙寅遣客省使慮懷忠等二十二人率禁軍會潞州
戊辰命昭化軍節度使李繼勳等征北漢九月辛巳朔
禁錢出塞癸未監察御史楊士達坐鞠獄濫殺棄市庚
子李繼勳敗北漢於銅溫河己酉北漢供奉官侯霸榮
弒其主繼恩繼元立冬十月己未畋近郊還幸飛龍院
丙子吳越王遣其子惟濬來朝貢十一月癸卯日南至
有事南郊改元開寶大赦十惡殺人官吏受贓者不原
宰相普等奉玉冊寶上尊號曰應天廣運大聖神武明

道至德仁孝皇帝十二月甲子行慶自開封興元尹宰相樞密使及諸道蕃侯並加勲爵有差乙丑大食國遣使獻方物

二年春正月己卯朔以出師不御殿二月乙卯命昭化軍節度使李繼勳爲河東行營前軍都部署侍衛步軍指揮使党進副之宣徽南院使曹彬爲都監棣州防禦使何繼筠爲石嶺關部署建雄軍節度使趙贊爲汾州路部署以伐北漢宴長春殿命彰德軍節度使韓仲贇爲北面都部署彰義軍節度使郭延義副之以防契丹戊午詔親征己酉以開封尹光義爲上都留守樞密副

使沈義倫爲大內部署判留司三司事甲子發京師乙亥雨駐潞州三月壬辰發潞州乙未李繼勳敗北漢軍於太原城下戊戌駕傳城下庚子觀兵城南築長連城辛丑幸汾河作新橋發太原諸縣丁數萬集城下癸卯北漢史昭文以憲州來降乙巳臨城南謂汾水可以灌其城命築長隄壅之決晉祠水注之遂砦城四面繼勳軍於南贊軍於西彬軍於北進軍於東乃北引汾水灌城辛亥遣海州刺史孫方進率兵圍汾州四月戊申幸城東觀築隄壬子復幸城東己未何繼筠敗契丹於陽曲斬首數千級俘武州刺史王彥符以獻命陳示所獲

首級鎧甲于城下壬戌幸汾河觀造船戊辰幸城西上
生院丙子復幸城西五月癸未韓仲贇敗契丹於定州
北自戊子至庚寅命水軍載弩環攻橫州團練使王庭
義殿前都虞候石漢卿死之甲午北漢趙文度以嵐州
來降甲辰都虞候趙廷翰奏諸軍欲登城以死攻上愍
之不允閏月戊申雉圯水注城中上遽登隄觀己酉右
僕射魏仁浦薨壬子以太常博士李光贊言議班師已
未命兵士遷河東民萬戶于山東庚申分命使臣率兵
赴鎮潞壬戌駕還戊辰駐蹕於鎮州六月丙子朔發鎮
州癸巳至自太原曲赦京城囚秋七月丁巳幸封禪寺

詔鎮深趙邢洛五州管內鎮砦縣悉城之甲子大宴賜
宰相樞密使翰林學士節度觀察使襲衣金帶戊辰西
南夷順化王子武才等來獻方物癸酉幸新水磴汴決
下邑乙亥壽星見八月丁亥詔川峽諸州察民有父母
在而別籍異財者論死九月乙巳朔幸武成王廟壬戌
幸玉津園宴射冬十月戊子畋近郊庚寅散指揮都知
杜延進等謀反伏誅夷其族詔相深趙三州丁夫死太
原城下者復其家庚子以王溥爲太子太師武衡德爲
太子太傅癸卯西川兵馬都監張延通內臣張嶼引進
副使王珏爲丁德裕所譖延通坐不遜誅嶼珏並杖配

十一月丙午幸鎮寧軍節度使張令鐸第視疾甲寅畋
近郊還幸金鳳園庚申回鶻于闐遣使來獻方物十二
月癸未幸中書視宰相趙普疾己亥右贊善大夫王昭
坐監大盈倉其子與倉吏爲姦贓奪兩任配隸汝州丁
德裕誣奏西川轉運使李鉉指斥事旣直猶坐酒失責
授右贊善大夫

三年春正月癸卯朔雨雪不御殿癸丑增河堤辛酉詔
民五千戶舉孝弟彰聞德行純茂者一人奇才異行不
拘此限里閭郡國遞審連署以聞仍爲治裝詣闕二月
庚寅幸西茶庫遂幸建隆觀三月庚戌詔闈進士十五

舉以上司馬浦等百六人並賜本科出身辛亥賜處士
王昭素國子博士致仕丙辰殿中丞張顥坐先知潁州
政不平免官己未幸宰相趙普第視疾夏四月辛未朔
日有食之丁亥幸寺觀禱雨辛卯雨甲午幸教船池己
亥罷河北諸州鹽禁詔郡國非其土產者勿貢五月丁
未禁京城民畜兵器癸丑幸城北觀水磴癸亥賜諸班
營舍爲雨壞者錢有差六月乙未禁諸州長吏親隨人
掌廂鎮局務秋七月乙巳立報水旱期式壬子詔蜀州
縣官以戶口差第省員加祿等詔諸路亦如之戊辰幸
教船池又幸玉津園宴射八月戊子幸教船池又幸玉

津園九月己亥朔命潭州防禦使潘美爲貴州道兵馬
行營都部署朗州團練使尹崇珂副之遣使發十州兵
會賀州以伐南漢甲辰詔西京鳳翔雄耀等州周文成
康三王秦始皇漢高文景武元成哀七帝後魏孝文西
魏文帝後周太祖唐高祖太宗中宗肅宗代宗德順文
武宣懿僖昭諸帝凡二十七陵嘗被盜發者有司備法
服常服各一龔具棺槨重葬所在長吏致祭己酉幸開
寶寺觀新鐘丙辰女真國遣使齎定安國王烈萬華表
獻方物丁卯潘美等敗南漢軍萬衆於富州下之十月
庚辰克賀州十一月壬寅下昭桂二州乙巳滅桂陽歲

貢白金額癸丑右領軍衛將軍石延祚坐監倉與吏爲
姦賊棄市癸亥定州駐泊都監田欽祚敗契丹於遂城
丙寅以曹州舉德行孔蟾爲章丘主簿十二月壬申潘
美等下連州辛卯大敗南漢軍萬餘於韶州下之癸巳
增河隄

四年春正月戊戌朔以出師不視朝丙午罷諸道州縣
攝官丁未右千牛衛大將軍桑進興坐賊棄市癸丑潘
美等取英州雄州二月丁亥南漢劉鋹遣其左僕射蕭
灌等以表來上己丑潘美克廣州俘劉鋹廣南平得州
六十縣二百十四戶十七萬二百六十三辛卯大赦廣

南免二稅僞署官仍舊三月乙未幸飛龍院賜從臣馬
丙申詔廣南有買人男女爲奴婢轉傭利者並放免僞
政有害于民者具以聞除之增前代帝王守陵戶二夏
四月丙寅朔前左監門衛將軍趙玘訴宰相趙普坐誣
毀大臣汝州安置丁卯三佛齊國遣使獻方物己巳詔
禁嶺南商稅鹽麩如荆湖法辛未幸永興軍節度使吳
廷祚第視疾癸未幸開寶寺辛卯南唐遣其弟從諫來
朝貢發廂軍千人修前代陵寢之在秦者壬辰監察御
史閻丘舜卿坐前任盜用官錢棄市五月乙未朔御明
德門受劉鋹俘釋之斬其柄臣龔澄樞李托薛崇譽大

宴於大明殿銀預焉丁酉賞伐廣南功潘美尹崇珂等
進爵有差六月癸酉遣使祀南海丁丑命翰林試南漢
官取書判稍優者授令錄簿尉壬午以孝子羅居通爲
延州主簿封劉銀爲恩叔侯乙酉罷賀州銀塲賜劉銀
月奉外錢五萬米麥五千斛河決原武汴決穀熟秋七
月戊戌賜開封尹光義門戟十四庚子幸新脩水磴賜
役人錢帛有差戊午復著內侍養子令癸亥幸建武軍
節度使何繼筠第視疾汴決宋城八月壬申文武百官
上尊號不允辛卯景星見冬十月癸亥朔日有食之己
巳詔僞作黃金者棄市庚午太子洗馬王元吉坐贓棄

市辛巳除廣南舊無名配斂甲申詔十月後犯強竊盜者郊赦不原丙戌放廣南民毆充軍者十一月癸巳朔南唐遣其弟從善吳越國王遣其子惟濬以郊祀來朝貢南唐主煜表乞去國號呼名從之庚戌詔諸道所罷攝官三任無遺闕者以聞河決澶州通判姚恕坐不卽上聞棄市己未日南至有事南郊大赦十惡故劫殺官吏受賊者不原詔置諸州幕職官奉戶壬戌蜀班內殿直四十人援御馬直例乞賞遂擢登聞鼓命各杖二十翌日悉斬于營都指揮單斌等皆杖降十二月癸亥朔賜南郊執事官器幣有差丁卯行慶開封尹光義興元

尹光美貴州防禦使德昭宰相趙普並益食邑己巳內
外文武官遞進勲爵辛未賜九經李符本科出身壬午
畋近郊

宋史卷三

元中書右丞相總裁脫脫等修

本紀第三

太祖三

五年春正月壬辰朔雨雪不御殿禁鐵鑄浮屠及佛像
庚子前盧縣尉鄆陵許永年七十有五自言父瓊年九
十九兩兄皆八十餘乞一官以便養因召瓊厚賜之授
永鄆陵令壬寅省州縣小吏及直力人乙巳罷襄州歲
貢魚二月丙子詔沿河十七州各置河隄判官一員庚
辰以鳳州七房銀冶爲開寶監庚寅以兵部侍郎劉熙

古參知政事閏月壬辰禮部試進士安守亮等諸科共
三十八人召對講武殿始放榜庚戌升密州爲安化軍
節度三月庚午賜潁州龍騎指揮使仇興及兵士錢辛
未占城國王波美稅遣使來獻方物壬申幸教船池習
戰乙酉殿中侍御史張穆坐贓棄市夏四月庚寅朔三
佛齊國主釋利烏耶遣使來獻方物丙午遣使檢視水
災田丙寅遣使諸州捕虎五月庚申賜恩赦侯劉銀錢
一百五十萬乙丑命近臣祈晴併廣南州十三縣三十
九丙寅罷嶺南採珠媚川都卒爲靜江軍辛未河決濮
陽命潁州團練使曹翰往塞之甲戌以霖雨出後宮五

十餘人賜予以遣之丁亥河南北滌雨澶滑濟鄆曹濮
六州大水六月己丑河決陽武汴決穀熟丁酉詔滌雨
河決沿河民田有爲水害者有司具聞除租戊申修陽
武隄秋七月己未朔右拾遺張恂坐贓棄市癸未邕容
等州獠人作亂庚寅高麗國王王昭遠遣使獻方物八
月己亥廣州行營都監朱憲大破獠賊於容州癸卯升
宿州爲保靜軍節度罷密州仍爲防禦九月丁巳朔日
有食之癸酉李崇矩以鎮國軍節度使罷冬十月庚子
幸河陽節度使張仁超第視疾甲辰試道流不才者勒
歸俗十一月己未李繼明藥繼清大破獠賊於英州癸

亥禁僧道習天文地理己巳禁舉人寄應庚辰命參知政事薛居正呂餘慶兼淮湖嶺蜀轉運使十二月乙酉朔祈雪己亥畋近郊開封尹光義暴疾遂如其第視之甲寅內班董延誥坐監務盜芻粟杖殺之詔合入令錄者引見後方注乙卯大雨雪是歲大饑

六年春正月丙辰朔不御殿置蜀水陸轉運計度使癸酉修魏縣河二月丙戌朔棣州兵馬殿直傅延翰謀反伏誅丙申曹州饑漕太倉米二萬石振之己亥吳越國進銀裝花段金香師子三月乙卯朔周鄭王殂于房州上素服發哀輟朝十日諡曰恭帝命還葬慶陵之側陵

曰順陵己未復密州爲安化軍節度庚申覆試進士於講武殿賜宋準及下第徐士廉等諸科百二十七人及第乙亥賜宋準等宴錢二十萬大食國遣使來獻翰林學士知貢舉李昉坐試人失當責授太常少卿試朝臣死王事者子陸坦等賜進士出身丙子幸相國寺觀新脩塔夏四月丁亥召開封尹光義大平軍節度使石守信等賞花習射於苑中辛丑遣盧多遜爲江南國信使甲辰占城國王悉利陀盤印茶遣使來獻方物丙午黎州保塞蠻來歸戊申詔修五代史五月庚申劉熙古以戶部尚書致仕詔中書吏擅權多姦賊兼用流內州縣

官已巳交州丁璉遣使貢方物幸玉津園觀刈麥辛巳
殺右拾遺馬適六月辛卯闕在京百司吏黜爲農者四
百人癸巳占城國遣使獻方物隰州巡檢使李謙溥拔
北漢七砦癸卯雷有鄰告宰相趙普黨堂吏胡贊等不
法贊及李可度並批籍沒庚戌詔參知政事與宰相趙
普分知印押班奏事秋七月壬子朔詔諸州府置司寇
參軍以進士明經者爲之丙辰減廣南無名率錢八月
乙酉罷成都府僞蜀嫁裝稅辛卯賜布衣王澤方同學
究出身丁酉泗州推官侯濟坐試判假手杖除名甲辰
趙普罷爲河陽三城節度使同平章事辛酉幸都亭驛

九月丁卯餘慶以尚書左丞罷己巳封光義爲晉王兼
侍中德昭同中書門下平章事薛居正爲門下侍郎同
平章政事戶部侍郎樞密副使沈義倫爲中書侍郎同
平章事石守信兼侍中盧多遜中書舍人參知政事王
申詔晉王光義班宰相上冬十月甲申葬周恭帝不視
朝丁亥幸玉津園觀稼戊子流星出文昌北斗甲辰特
赦諸官吏姦賊十一月癸丑詔常參官進士及第者各
舉文學一人十二月壬午命近臣祈雪丙午前中書舍
人參知政事多遜起復視事行開寶通禮限度僧法諸
州僧帳及百人歲許度一人

七年春正月庚戌不御殿庚申占城國王波美稅遣使獻方物齊州野蠶成繭癸亥左拾遺秦亶太子中允呂鵠並坐贓宥死杖除名二月庚辰朔日有食之丙戌日有二黑子癸卯命近臣祈雨詔詩書易三經學究依三經三傳資敘入官乙巳太子中舍胡德沖坐隱官錢棄市三月乙丑三佛齊國王遣使獻方物夏四月丙午遣使檢嶺南民田五月戊申朔殿中侍御史李瑩坐受南唐餽遺責受左贊善大夫甲寅以布衣齊得一爲章丘主簿乙丑詔市二價者以枉法論丙寅幸講武池觀習水戰丙子又幸講武池遂幸玉津園六月丙申河中府

饑發粟三萬石振之己亥淮溢入泗州城壬寅安陽河
溢皆壞民居秋七月壬子幸講武池觀習水戰遂幸玉
津園丙辰南丹州溪洞酋帥莫洪燕內附詔減成都府
鹽錢庚午太子中允李仁友坐不法棄市八月戊寅吳
越國王遣使來朝貢丁亥諭吳越伐江南戊子陳州貢
芝草一本四十九莖己丑幸講武池賜習水戰軍士錢
戊戌殿中丞趙象坐擅稅除名甲辰幸講武池觀習水
戰遂幸玉津園九月癸亥命宣徽南院使義成軍節度
使曹彬爲西南路行營馬步軍戰權都部署山南東道
節度使潘美爲都監潁州團練使曹翰爲先鋒都指揮

使將兵十萬出荆南以伐江南將行召曹彬潘美戒之曰城陷之日慎無殺戮設若困鬪則李煜一門不可加害丁卯以知制誥李穆爲江南國信使冬十月甲申幸迎春苑登汴隄觀戰艦東下丙戌又幸迎春苑登汴隄觀諸軍習戰遂幸東水門發戰櫂東下江南進絹數萬御衣金帶器用數百事壬辰曹彬等將舟師步騎發江陵水陸並進丁酉命吳越王錢俶爲昇州東南行營招撫制置使己亥曹彬收下峽口獲指揮使王仁震王宴錢興閏月己酉克池州丁巳敗江南軍于銅陵庚申命宰相參知政事更知日曆壬戌彬等拔蕪湖當塗兩縣

駐軍采石癸亥詔減湖南新製茶甲子薛居正等上新
編五代史賜器幣有差丁卯彬敗江南軍于采石擒兵
馬部署楊收都監蔡震等千人爲浮梁以濟十一月癸
未黥李從善部下及江南水軍一千三百九十人爲歸
化軍甲申詔省劔南山南等道屬縣主簿丁亥秦晉旱
免蒲陝晉絳同解六州逋賦關西諸州免其半己丑知
漢陽軍李恕敗江南水軍于鄂甲午曹彬敗江南軍於
新竹砦辛丑命知雄州孫全興荅涿州修好書壬寅大
食國遣使獻方物十二月己酉彬敗江南軍於白鷺洲
辛亥命近臣祈雪甲子吳越王帥兵圍常州獲其人馬

尋拔利城砦丙寅彬敗江南軍於新林港己巳左拾遺
劉祺坐受賂黥面杖配沙門島庚午北漢寇晉州守臣
武守琦敗之於洪洞壬申吳越王敗江南軍於常州北
界

八年春正月甲戌朔以出師不御殿丙子知池州樊若
水敗江南軍於州界田欽祚敗江南軍於溧水斬其都
統使李雄乙酉御長春殿謂宰相曰朕觀爲臣者比多
不能有終豈忠孝薄而無以享厚福邪宰相居正等頓
首謝庚寅曹彬拔昇州城南水砦二月癸丑彬敗江南
軍於白鷺洲乙卯拔昇州關城丁巳太子中允徐昭文

坐抑人售物除籍甲子知揚州侯陟敗江南軍於宣化
鎮戊辰覆試進士於講武殿賜王嗣宗等三十一人諸
科紀自成等三十四人及第三月乙酉賜王嗣宗等宴
錢二十萬己丑命祈雨庚寅彬敗江南軍於江北己亥
契丹遣使克沙骨慎思以書來講和知潞州藥繼能拔
北漢鷹澗堡辛丑召契丹使於講殿觀習射壬寅遣內
侍王繼恩領兵赴昇州大食國遣使來朝獻夏四月乙
巳幸東水磴癸丑幸都亭驛閱新戰船丁巳吳越王拔
常州壬戌彬等敗江南軍於秦淮北戊辰幸玉津園觀
種稻遂幸講武池觀習水戰庚午詔嶺南盜賊滿十貫

以上者死幸西水磴五月壬申朔以吳越國王錢俶守
太師尚書令益食邑知桂陽監張侃發前官隱沒羨銀
追罪兵部郎中董樞右贊善大夫孔璘殺之太子洗馬
趙瑜杖配海島侃受賞遷屯田員外郎辛巳祈晴甲申
江南寧遠軍及沿江砦並降乙酉詔武岡長沙等十縣
民爲賊鹵掠者蠲其逋租仍給復一年甲午安南都護
丁璉遣使來貢六月壬寅曹彬等遣使言敗江南軍於
其城下辛丑河決濮州丁未宋州觀察判官崔絢錄事
參軍馬德休並坐贓棄市辛亥河決澶州頓丘甲子葺
出柳長四丈辰見東方秋七月辛未朔日有食之庚辰

遣閣門使郝崇信太常丞呂端使契丹癸未西天東印
土王子穰結說囉來朝獻甲申詔吳越王班師己亥山
後兩林鬼主懷化將軍勿尼等來朝獻八月乙卯幸東
水磴觀魚遂幸北園辛酉詔權停今年貢舉壬戌契丹
遣左衛大將軍耶律霸德等致御衣玉帶名馬西南蕃
順化王子若廢等來獻名馬癸亥丁德裕敗潤州兵於
城下九月壬申狩近郊逐兔馬蹶墜地因引佩刀刺馬
殺之旣而悔之曰吾爲天下主輕事畋獵又何罪馬哉
自是遂不復獵戊寅潤州降冬十月己亥朔江南主遣
徐鉉周惟簡來乞緩師辛亥詔郡國令佐察民有孝悌

力田奇材異行或文武可用者遣詣闕丁巳修西京宮
闕江南主貢銀五萬兩絹五萬匹乞緩師戊午改潤州
鎮江軍節度爲鎮海軍節度幸晉王北園己未曹彬遣
都虞候劉遇破江南軍於皖口擒其將朱令贇王暉十
一月辛未江南主遣徐鉉等再奉表乞緩師不報甲申
曹彬夜敗江南軍於城下丙戌以校書郎宋準殿直邢
文慶充賀契丹正旦使乙未曹彬克昇州俘其國主煜
江南平凡得州十九軍三縣一百八十戶六十五萬五
千六十臨視新龍興寺十二月庚子幸惠民河觀築堰
辛丑赦江南復一歲兵戈所經二歲戊申三佛齊遣使

來獻方物己酉幸龍興寺辛亥免開封府諸縣今年秋
租十之三己未以恩赦侯劉鋹爲彭城郡公甲子契丹
遣使耶律烏正來賀正旦丁卯吳越國王乞以長春節
朝覲從之

九年春正月辛未御明德門見李煜于樓下不用獻俘
儀壬申大赦減死罪一等乙亥封李煜爲違命侯子弟
臣僚班爵有差己卯江南昭武軍節度使留後盧絳焚
掠州縣庚辰詔郊西京癸巳晉王率文武上尊號不允
二月癸卯三上表不允庚戌以曹彬爲樞密使辛亥命
德昭迎勞吳越國王錢俶於宋州契丹遣使耶律延顛

以御衣玉帶名馬散馬白鶻來賀長春節乙卯吳越王
奏內客省使丁德裕貪狼貶房州刺史丁巳觀禮賢宅
戊午以盧多遜爲吏部侍郎仍參知政事己未吳越國
王錢俶偕子惟濬等朝於崇德殿進銀絹以萬計賜俶
衣帶鞍馬遂以禮賢宅居之宴於長安殿壬戌錢俶進
賀平昇州銀絹乳香吳綾紬綿錢茶犀象香藥皆億萬
計甲子召晉王吳越國王并其子等射於苑中俶進御
衣壽星通犀帶及金器丁卯幸禮賢宅賜俶金器及銀
絹倍萬三月己巳俶進助南郊銀絹乳香以萬計庚午
賜俶劔履上殿詔書不名癸酉以皇子德芳爲檢校太

保貴州防禦使中書侍郎同平章事沈義倫爲大內都
部署右衛大將軍王仁瞻權判留司三司兼知開封府
事丙子幸西京己卯次鞏縣拜安陵號慟隕絕者久之
庚辰賜河南府民今年田租之半奉陵戶復一年辛巳
至洛陽庚寅大雨分命近臣詣諸祠廟祈晴辛卯幸廣
化寺開無畏三藏塔夏四月己亥雨霽庚子有事圓丘
迴御五鳳樓大赦十惡故殺者不原貶降責免者量移
敘用諸流配及逋欠悉放諸官未贈恩者悉覃賞壬寅
大宴賜親王近臣列校襲衣金帶鞍馬器幣有差丙午
駕還辛亥上至自洛丁巳曹翰拔江州屠之擒牙校宋

德明胡則等詔益晉王食邑光美德昭並加開府儀同
三司德芳益食邑薛居正沈義倫加光祿大夫樞密使
曹彬宣徽北院使潘美加特進吳越國王錢俶益食邑
內外文武臣僚咸進階封己未著令旬假爲休沐丙寅
大食國王珂黎拂遣使蒲希密來獻方物五月己巳幸
東水磴遂幸飛龍院觀漁金水河甲戌遣司勳員外郎
和峴往江南路採訪殺盧絳庚辰幸講武池遂幸玉津
園觀稼宋州大風壞城樓官民舍幾五千間甲申以閣
門副使田守奇等充賀契丹生辰使晉州以北漢嵐石
憲三州巡檢使王洪武等來獻六月庚子步至晉王邸

命作機輪輓金水河注邸中爲池癸卯吳越王進銀絹
綿以倍萬計乙卯熒惑入南斗秋七月戊辰幸晉王第
觀新池丙子幸京兆尹光美第視疾戊寅再幸光美第
泉州節度使陳洪進乞朝覲丙戌命近臣祈晴丁亥命
修先代帝王及五嶽四瀆祠廟庚寅幸光美第八月乙
未朔吳越國王進射火箭軍士己亥幸新龍興寺辛丑
太子中允郭思齊坐贓棄市乙巳幸等覺院遂幸東築
院賜工人錢又幸控鶴營觀習射賜帛有差又幸開寶
寺觀藏經丁未遣侍衛馬軍都指揮使党進宣徽北院
使潘美伐北漢丙辰遣使率兵分五道入太原九月甲

子幸綾錦院庚午權高麗國事王佺遣使來朝獻党進
敗北漢軍於太原城北辛巳命忻代行營都監郭進遷
山後諸州民庚寅幸城南池亭遂幸禮賢宅又幸晉王
第冬十月甲午朔旦賜文武百官衣有差丁酉兵馬監
押馬繼恩率兵入河東界焚蕩四十餘砦己亥幸西教
場庚子鎮州巡檢郭進焚壽陽縣俘九千人辛丑晉隰
巡檢穆彥璋入河東俘二千餘人党進敗北漢軍於太
原城北己酉吳越王獻馴象癸丑文帝崩於萬歲殿年
五十殯于殿西階諡曰英武聖文神德皇帝廟號太祖
太平興國二年四月乙卯葬永昌陵大中祥符元年加

上尊諡曰啓運立極英武睿文神德聖功至明大孝皇帝帝性孝友節儉質任自然不事矯飾受禪之初頗好微行或諫其輕出曰帝王之興自有天命周世宗見諸將方面大耳者皆殺之我終日侍側不能害也旣而微行愈數有諫輒語之曰有天命者任自爲之不汝禁也一日罷朝坐便殿不樂者久之左右請其故曰爾謂爲天子容易耶早作乘快誤決一事故不樂耳汴京新宮成御正殿坐令洞開諸門謂左右曰此如我心少有邪曲人皆見之吳越錢俶來朝自宰相以下咸請留俶而取其地帝不聽遣俶歸國及辭取羣臣留俶章疏數十

軸封識遺俶戒以塗中密觀俶屆途啓視皆留己不遺之章也俶自是感懼江南平遂乞納土南漢劉鋹在其國好置醢以毒臣下旣歸朝從幸講武池帝酌卮酒賜鋹鋹疑有毒捧杯泣曰臣罪在不赦陛下旣待臣以不死願爲大梁布衣觀太平之盛未敢飲此酒帝笑而謂之曰朕推赤心於人腹中寧肯爾耶卽取銀酒自飲別酌以賜鋹王彥昇擅殺韓通雖預佐命終身不與節鉞王全斌入蜀貪恣殺降雖有大功卽加貶絀宮中葦簾緣用青布常服之衣澣濯至再魏國長公主襦飾翠羽戒勿復用又教之曰汝生長富貴當念惜福見孟昶寶

裝溺器搯而碎之曰汝以七寶飾此當以何器貯食所
爲如是不亡何待晚好讀書嘗讀二典歎曰堯舜之罪
四凶止從投竄何近代法網之密乎謂宰相曰五代諸
侯跋扈有枉法殺人者朝廷置而不問人命至重姑息
藩鎮當若是耶自今諸州決大辟錄案聞奏付刑部覆
視之遂著爲令乾德改元先諭宰相曰年號須擇前代
所未有者三年蜀平蜀宮人入內帝見其鏡背有志乾
德四年鑄者召寶儀等詰之儀對曰此必蜀物蜀主嘗
有此號乃大喜曰作相須讀書人由是大重儒者受命
杜太后傳位太宗太宗嘗病亟帝往視之親爲灼艾太

宗覺痛帝亦取艾自灸每對近臣言太宗龍行虎步生時有異他日必爲太平天子福德吾所不及云

贊曰昔者堯舜以禪代湯武以征伐皆南面而有天下四聖人者往世道升降否泰推移當斯民塗炭之秋皇天眷求民主亦惟責其濟斯世而已使其必得四聖人之才而後以其行事畀之則生民平治之期殆無日也五季亂極宋太祖起介冑之中踐九五之位原其得國視晉漢周亦豈甚相絕哉及其發號施令名藩大將俯首聽命四方列國次第削平此非人力所易致也建隆以來釋藩鎮兵權繩賊吏重法以塞濁亂之源州郡司

牧下至令錄幕職躬自引對務農興學慎罰薄斂與世
休息迄於丕平治定功成制禮作樂在位十有七年之
間而三百餘載之基傳之子孫世有典則遂使三代而
降考論聲明文物之治道德仁義之風宋於漢唐蓋無
讓焉烏虜創業垂統之君規模若是亦可謂遠也已矣

宋史卷三

宋史卷一考證

太祖紀一建隆三年六月乙未賜酒國子監○

臣人龍

按宋會要建隆中凡三幸國子監謁文宣王廟

宋史卷三考證

宋史卷四

元中書右丞相總裁脫脫等修

本紀第四

太宗一

太宗神功聖德文武皇帝諱炁初名匡乂改賜光義卽位之二年改今諱宣祖第三子也母曰昭憲皇后杜氏初后夢神人捧日以授己而有娠遂生帝於浚儀官舍是夜赤光上騰如火閭巷聞有異香時晉天福四年十月十七日甲辰也帝幼不羣與他兒戲皆畏服及長隆準龍顏望之知爲大人儼如也性嗜學宣祖總兵淮南

破州縣財物悉不取第求古書遺帝恒飭厲之帝由是
工文業多藝能仕周至供奉官都知太祖卽位以帝爲
殿前都虞候領睦州防禦使親征澤潞帝以大內點檢
留鎮尋領泰寧軍節度使征李重進爲大內都部署加
同平章事行開封尹再加兼中書令征太原改東都留
守別賜門戟封晉王序班宰相上開寶九年冬十月癸
丑太祖崩帝遂卽皇帝位乙卯大赦常赦所不原者咸
除之丙辰羣臣表請聽政不許丁巳宰相薛居正等固
請乃許卽日移御長春殿庚申以弟廷美爲開封尹兼
中書令封齊王先帝子德昭爲永興軍節度使兼侍中

封武功郡王德芳爲山南西道節度使興元尹同平章
事薛居正加左僕射沈倫加右僕射盧多遜爲中書侍
郎曹彬仍樞密使並同平章事楚昭輔爲樞密使潘美
爲宣徽南院使內外官進秩有差詔茶鹽權酷用開寶
八年額十一月癸亥朔帝不視朝甲子追冊故尹氏爲
淑德皇后越國夫人符氏爲懿德皇后戊辰罷州縣奉
戶庚午詔諸道轉運使察州縣官吏能否第爲三等歲
終以聞命諸州大索知天文術數人送闕下匿者論死
乙亥命權知高麗國事王侁爲高麗國王癸未幸相國
寺己丑遣著作郎馮正佐郎張玘使契丹告哀詔文武

官由譴累不齒者有司毋得更論前過十二月己亥置直舍人院甲寅御乾元殿受朝樂縣而不作大赦改是歲爲太平興國元年命太祖子及齊王廷美子並稱皇子女並稱皇女丁巳置三司副使戊午契丹遣使來聘己未幸講武池遂幸玉津園庚申節度使趙普向拱張承德高懷德馮繼業張美劉廷讓來朝

二年春正月壬戌以大行殯不視朝丙寅禁居官出使者行商賈事戊辰親試禮部舉人甲戌上大行皇帝諡曰英武聖文神德廟號太祖丙子宰相國寺還御東華門觀燈庚辰閱禮部貢士十舉至十五舉者百二十人

並賜出身戊子命邕州廣源州會長坦坦綽儂民富爲
檢校司空御史大夫上柱國辛卯幸講武池置江南權
茶場二月甲午契丹遣使來賀卽位及正旦吳越國遣
使來貢罷南唐鐵錢庚子帝改名昷壬寅大宴崇德殿
不作樂乙巳幸新鑿池遂幸講武池宴射玉津園丁未
占城國遣使來貢己酉令江南諸州鹽先通商處悉禁
之戊午幸太平興國寺遂幸造船務還幸建隆觀三月
壬戌朔始立試官銜選限己卯以河陽節度使趙普爲
太子少保己丑幸開寶寺置威勝軍禁江南諸州銅許
契丹互市夏四月辛卯大食國遣使來貢丁酉契丹遣

使來會葬乙卯葬太祖于永昌陵五月壬戌河南法曹
叅軍高丕伊闕縣主簿翟麟鄭州榮澤令申廷溫坐不
勤事並免癸亥向拱張承德張美劉廷讓皆罷節鎮爲
諸衛上將軍乙丑幸新水磴遂幸玉津園宴射丙寅詔
繼母殺子及婦者同殺人論庚午宴崇德殿不作樂遣
辛仲甫使契丹甲戌以十月十七日爲乾明節己卯祔
太祖神主于廟以孝明皇后王氏配又以懿德皇后符
氏淑德皇后尹氏祔別廟庚辰詔作北帝宮于終南山
癸未幸新水磴遂宴射玉津園六月辛卯朔白龍見邠
州要策池中乙卯幸開寶寺遂幸飛龍院賜從官馬是

月磁州保安等縣墨蟲生食桑葉殆盡潁州大水秋十月庚午詔諸庫藏敢變權衡以取羨餘者死癸未鉅鹿沙河步屈食桑多河決滎澤頓丘白馬溫縣閏月己亥幸白鵲橋臨金水河己酉河溢開封等八縣害稼甲寅詔發潭州兵擊梅山洞賊丁巳有司上閏年輿地版籍之圖令支郡得專奏事八月癸亥黎州兩林蠻來貢乙丑平海軍節度使陳洪進來朝癸酉以觀燈遂幸相國寺戊寅詔作崇聖殿是月陝澶道忠壽諸州大水鉅鹿步蝻生景城縣雹九月乙未幸弓箭院遂幸新修三館壬寅幸新水磴遂幸西御園宴射丁未渤尼國遣使來

貢山後兩林蠻來獻馬辛亥幸講武臺大閱容州初貢
珠乙卯鎮海鎮東軍節度使錢惟濬來朝丙辰狩近郊
丁巳吳越王遣使乞呼名不允是月興州江水溢濮州
大水汴水溢冬十月戊午朔賜百官及在外將校長吏
冬服辛酉契丹來賀乾明節己巳幸京城西北觀衛士
與契丹使騎射遂宴苑中己巳羣臣請舉樂表二上從
之丙子詔禁天文卜相等書私習者斬辛巳畋近郊初
權酒酤十一月丁亥朔日有食之既庚寅日南至帝始
受朝甲午遣李瀆等賀契丹正旦丁酉禁江南諸州新
小錢私鑄者棄市癸丑幸御龍弓箭直營賜軍士錢帛

有差十二月丁巳朔試諸州所送天文術士隸司天臺
無取者黥配海島庚午畋近郊癸酉詔定晉州礮法私
賚及私販易者罪有差辛巳幸新水磴高麗國王使其
子元輔來賀卽位

三年春正月丙戌朔不受朝羣臣詣閣賀庚寅殿直霍
瓊坐募兵劫民財腰斬甲午浚汾河雅州西山野川路
蠻來朝戊戌開襄漢漕渠渠成而水不上卒廢己亥光
祿丞李之才坐擅入酒邀同列飲殿中除名庚子罷陳
州蔡河舟算辛丑浚廣濟惠民及蔡三河治黃河隄乙
巳浚汴口己酉命修太祖實錄辛亥命羣臣禱雨癸丑

京畿雨足二月丙辰幸鄭國公主第以三館新修書院
爲崇文院丁巳詔班諸州錄事縣令簿尉曆子合書式
甲子罷昌州七井虛額監丙寅泗州錄事參軍徐璧坐
監倉受賄出虛券棄市辛未幸西綾錦院命近臣觀織
室機杼還幸崇文院觀書詔鑿金明池甲申禁沿邊諸
郡闌出銅錢製西京新修殿名三月乙酉朔貝州清河
民田祚十世同居詔旌其門閭復其家辛丑監海門戍
殿直武裕坐姦賊棄市壬寅秦州言戎酋王泥猪寇八
狼戍巡檢劉崇讓擊敗之梟其首以徇己酉吳越國王
錢俶來朝壬子幸開寶寺是月壽州甘露降夏四月乙

卯朔命羣臣禱雨召華山道士丁少微丙辰禁民自春
及秋毋捕獵庚午幸建龍觀遂幸西築院又幸造船務
乙亥置諸道轉運判官己卯陳洪進獻漳泉二州凡得
縣十四戶十五萬一千九百七十八兵萬八千七百二
十七庚辰幸城南觀麥遂幸玉津園宴射辛巳侍御史
趙承嗣坐監市征隱官錢棄市癸未以陳洪進爲武寧
軍節度使同平章事錢俶乞罷所封吳越國王及解天
下兵馬大元帥并寢書詔不名之命歸其兵甲求還不
許是月河決獲嘉縣五月乙酉赦漳泉仍給復一年錢
俶獻其兩浙諸州凡得州十三軍一縣八十六戶五十

五萬六百八十兵一十一萬五千三十六丁亥封錢俶
爲淮海國王其子惟濬徙淮南軍節度使惟治徙鎮國
軍節度使戊子赦兩浙給復如漳泉癸巳遣李從吉等
使契丹乙未占城國遣使獻方物壬寅定難軍節度使
李克叡卒子繼筠立乙巳以繼筠襲定難軍節度使幸
殿前都指揮使楊信第視疾戊申以秦州節度判官李
若愚子飛雄矯制乘驛至清水縣縛都巡檢周承瑨及
劉文裕馬知節等七人將劫守卒據城爲叛文裕覺其
詐禽縛飛雄按之盡得共狀詔誅飛雄及其父母妻子
同產而哀若愚宗奠無主申戒中外臣庶自今子弟有

素懷凶險屢戒不悛者尊長聞諸州縣錮送闕下配隸
遠處隱不以聞坐及期功以上六月戊午復給乘驛銀
牌壬午秦州清水監軍田仁朗擊破西羌斬獲甚衆癸
未詔太平興國元年十月乙卯以來諸職官以贓致罪
者雖會赦不得敘永爲定制是月泗州大水汴水決寧
陵縣秋七月乙酉大雨震電西密務藁聚焚壬辰右千
牛衛上將軍李煜卒追封吳王戊戌金鄉縣民李光襲
十世同居詔旌其門庚戌改明德門爲丹鳳門壬子中
書令史李知古坐受賕擅改刑部所定法杖殺之八月
癸丑幸南造船務遂幸玉津園宴射滑州黃河清丙辰

詔兩浙發淮海王總麻以上親及管內官吏赴闕辛未
夷州蠻任朗政來貢癸酉詹事丞徐選坐贓杖殺之甲
戌羣臣請上尊號曰應運統天聖明文武皇帝許之九
月甲申親試禮部舉人壬子以布衣張遯爲襄邑縣主
簿張文旦濮陽縣主簿冬十月癸丑朔契丹遣使來賀
乾明節高麗國王遣使來貢庚申幸武功郡王德昭邸
遂幸齊王邸賜齊王銀萬兩絹萬匹德昭德芳有差辛
酉復覓州曲阜縣襲封文宣公家庚午畋近郊是月河
決靈河縣十一月丙申祀天地于圜丘大赦御乾元殿
受尊號庚子幸齊王邸丙午以郊祀中外文武加恩十

二月乙丑幸講武臺觀機石連弩庚午畋近郊戊寅契丹遣使來賀正旦己卯置三司推官巡官

四年春正月丁亥命太子中允張洎著作佐郎旬中正使高麗告以北伐遣官分督諸州軍儲輸太原行營庚寅以宣徽南院使潘美爲北路都招討制置使分命節度使河陽崔彥進彰德李漢瓊彰信劉遇桂州觀察使曹翰副以衛府將直四面進討侍衛馬軍都虞候米信步軍都虞候田重進並爲行營指揮使將其軍以從西上閣門使郭守文順州團練使梁廻監護之辛卯命雲州觀察使郭進爲太原石嶺關都部署以斷燕薊援師

癸巳置簽署樞密院事以石熙載爲之乙未宴潘美等
于長春殿賜以襲衣金帶鞍馬癸卯新渾儀成二月壬
子幸園子監遂幸玉津園宴射甲寅以齊王廷美子德
恭爲貴州防禦使丙辰以中書侍郎尚書右僕射同平
章事沈倫爲東京留守兼判開封府事宣徽北院使王
仁贍爲大內都部署樞密承旨陳從信副之癸亥賜扈
從近臣鞍馬衣服金玉帶有差甲子帝發京師戊寅次
澶州觀魚于河三月庚辰朔次鎮州丁亥郭進破北漢
西龍門砦禽獲甚衆乙未郭進大破契丹于關南庚子
左飛龍使史業破北漢鷹揚軍俘百人來獻乙巳夏州

李繼筠乞帥所部助討北漢詔泉州發兵護送陳洪進親屬赴闕夏四月己酉朔嵐州行營與北漢軍戰破之庚戌孟縣降以石熙載爲樞密副使辛酉以孟玄喆劉廷翰爲兵馬都鈐轄崔翰總馬步軍並注泊鎮州壬戌帝發鎮州折御卿克岢嵐軍獲其軍使折令圖乙丑克隆州獲其招討使李詢等六人已巳折御卿克嵐州殺其憲州刺史郭翊獲夔州節度使馬延忠庚午次太原駐蹕汾東行營辛未幸太原城詔諭北漢主劉繼元使降壬申夜帝幸城西督諸將發機石攻城甲戌幸諸砦乙亥幸連城視攻城諸洞五月己卯朔攻城西南遂陷

羊馬城獲其宣徽使范超斬燾下辛巳攻城西北壬午其騎帥郭萬超來降遂移幸城南手詔賜繼元癸未進攻將士盡奮若將屠之是夜繼元遣使納欵甲申繼元降北漢平凡得州十縣四十戶三萬五千二百二十命祠部郎中劉保勛知太原府乙酉赦河東常赦所不原者命錄死事將校子孫瘞戰士戊子以榆次縣爲新并州優賞歸順將校盡括僧道隸西京寺觀官吏及高貲戶授田河南北漢節度使蔚進盧遂以汾州降己丑以繼元爲右衛上將軍彭城郡公帝作平晉詩令從臣和辛卯繼元獻官妓百餘以賜將校乙未築新城送劉繼

元總麻以上親赴闕丙申幸城北御沙河門樓盡徙餘民于新城遣使督之既出卽命縱火丁酉以行宮爲平晉寺帝作平晉記刻寺中廢隆州隳其城庚子發太原丁未次鎮州六月甲寅以將伐幽薊遣發京東河北諸州軍儲赴北面行營庚申帝復自將伐契丹丙寅次金臺頓募民爲鄉導者百人丁卯次東易州刺史劉宇以城降留兵千人守之戊辰次涿州判官劉厚德以城降己巳次鹽溝頓民得近界馬來獻賜以束帛庚午次幽州城南駐蹕寶光寺契丹軍城北帝率衆擊走之壬申命節度使定國宋偓河陽崔彥進彰信劉遇定武孟玄

詰四面分兵攻城以潘美知幽州行府事契丹鐵林廂主李札盧存以所部來降癸酉移幸城北督諸將進兵獲馬三百幽州神武廳直并鄉兵四百人來降乙亥范陽民以牛酒犒師丁丑帝乘輦督攻城秋七月庚辰契丹建雄軍節度使知順州劉廷素來降壬午知薊州劉守恩來降癸未帝督諸軍及契丹大戰于高粱河敗績甲申班師庚寅命孟玄詰屯定州崔彥進屯關南乙巳帝至自范陽八月壬子西京留守石守信坐從征失律貶崇信軍節度使甲寅彰信軍節度使劉遇貶宿州觀察使癸亥命潘美屯河東三交口甲戌汴水決宋城縣

武功郡王德昭自殺詔作太清樓是月秦州大水九月
己卯河決汲縣丁亥置皇子侍讀己亥幸新城觀鐵林
軍人射强弩庚子華山道士丁少微詣闕獻金丹及巨
勝南芝亥芝癸卯山後兩林蠻以名馬來獻丙午鎮州
都鈐轄劉廷翰及契丹戰于遂城西大敗之斬首萬三
百級獲三將馬萬匹冬十月乙亥以平北漢功齊王廷
美進封秦王薛居正加司空沈倫加左僕射盧多遜兼
兵部尚書曹彬兼侍中白進超崔翰劉廷翰田重進米
信並領諸軍節度使楚昭輔崔彥進李漢瓊並加檢校
太尉潘美加檢校太師王仁贍加檢校太傅石熙載加

刑部侍郎文武從臣進秩有差十一月庚辰放道士丁少微歸華山己丑畋近郊辛卯忻州言與契丹戰破之關南言破契丹斬首萬餘級十二月丁未占城國遣使來貢丁卯畋近郊置諸州司理判官

五年春正月庚辰詔宣慰河東諸州壬午新作天駟左右監以左右飛龍使爲左右天廐使閑廐使爲崇儀使庚寅改端明殿學士爲文明殿學士二月戊辰斬徐州妖賊李緒等七人廢順化軍三月戊子會親王宰相淮海國王及從臣蹴鞠大明殿己丑左監門衛上將軍劉銀卒追封南越王癸巳代州言宣徽南院使潘美敗契

丹之師于鴈門殺其駙馬侍中蕭咄李獲都指揮使李
重誨閏三月丙午幸水磴因觀魚甲寅親試禮部舉人
丁巳親試諸科舉人庚午幸講武池觀習樓船辛未甘
沙州回鶻遣使以橐駝名馬來獻夏四月癸未親試應
百篇舉趙昌國賜及第壅汾河晉祠水灌太原隳其故
城是月壽州風雹寇氏縣雨雹五月癸卯朔大霖雨辛
酉命宰相祈晴六月壬午高麗國王遣使來貢是月穎
州大水徐州白溝溢入城秋七月丁未討交州黎桓命
蘭州團練使孫全興八作使張濬左監門衛將軍崔亮
寧州刺史劉澄軍器庫副使賈湜閣門祇候王僕並爲

部署全興濬亮由邕州澄湜僎由廉州各以其衆致討
庚申北海好蚘生八月甲申西南蕃主龍瓊瑇使其子
羅若從并諸州蠻來貢九月癸卯黎桓遣使爲丁璿上
表求襲位甲辰史館上太祖實錄壬戌改近郊冬十月
戊寅大發兵屯關南及鎮定州己丑發京師至雄州民
治道甲午命侍衛馬軍都指揮使米信護定州屯兵十
一月庚子朔安南靜海軍節度行軍司馬權知州事丁
璿上表求襲位不報丙午以秦王廷美爲東京留守王
仁贍爲大內都部署陳從信副之己酉帝伐契丹壬子
發京師癸丑次長垣縣關南與契丹戰大破之以河陽

三城節度使崔彥進爲關南都部署戊午駐蹕大名府諸軍及契丹大戰于莫州敗績十二月甲戌大閱遂宴幄殿衛士有盜獲麀者當坐詔特釋之戊寅以保靜軍節度使劉遇威塞軍節度使曹翰爲幽州東西路部署庚辰發大名府因校獵乙酉帝至自大名府交州行營與賊戰大破之

六年春正月癸卯置平塞靜戎二軍辛亥易州破契丹數千衆丙寅改靜戎軍爲安靜軍二月己卯命宰臣禱雨三月己酉興元尹德芳薨追封岐王癸丑詔令諸路轉運使察官吏賢否以聞丙辰置破虜平戎二軍丁巳

高昌國遣使來貢壬戌交州行營破賊于白藤江口獲
戰艦二百艘知邕州侯仁貴死之會炎瘴軍士多死者
轉運使許仲宣驛聞詔班師詔斬劉澄賈湜于軍中徵
孫全興下獄令諸州長吏五日一慮囚夏四月辛未幸
太平興國寺禱雨丙戌高麗國遣使來貢禁西川諸州
白衣巫師罷湖州織羅放女工五月己未雨降死罪囚
流以下釋之平塞軍與契丹戰破之六月甲戌司空平
章事薛居正薨七月丙午詔渤海琰府王助討契丹是
月廷州鄜寧河中大水宋州蝗九月乙未朔日有食之
甲辰左拾遺田錫上疏極諫詔嘉獎之丙午置京朝官

差遣院初令中書舍人郭贄等考校課績辛亥以趙普爲司徒石熙載爲樞密使壬子詔求直言丙辰易州言破契丹斬綿州妖賊王禧等十人冬十月癸酉羣臣三奉表上尊號曰應運統天睿文英武大聖至明廣孝皇帝許之甲申以河陽三城節度使崔彥進爲關南都部署侍衛馬軍都指揮使米信爲定州都部署丙戌校歷代醫書甲午詔作蘇州太一宮成十一月丁酉監察御史張白坐知蔡州日假官錢糶糶棄市甲辰改武德司爲皇城司女真遣使來貢辛亥祀天地于圓丘大赦御乾元殿受尊號內外文武加恩壬子令諸州監臨官有

所聞見傳聞須面陳者俟報丁巳交州行營部署孫全
興棄市辛酉以樞密使楚昭輔爲左驍衛上將軍十二
月癸酉購求醫書己卯畋近郊己丑諸道節度州置觀
察支使奉料同掌書記仍不得並置辛卯禁民私市近
界部落馬

七年春正月甲午朔不受朝羣臣詣閣稱賀壬戌定輿
服等差及婚取喪葬儀制二月甲申改關南爲高陽關
徙并州治唐明鎮乙酉特貲廬州管內漣米萬七千二
百四十石三月癸巳朔日有食之乙未以秦王廷美爲
西京留守乙巳以旱分遣中黃門徧禱方岳交州以王

師致討遣使來謝壬子賜秦王襲衣通犀帶錢十萬是月舒州上玄石有白文曰丙子年出趙號二十一帝宣州雪霜殺桑害稼北陽縣蝗飛鳥數萬食之盡夏四月甲子以樞密直學士竇偁中書舍人郭贄並叅知政事如京使柴禹錫爲宣徽北院使兼樞密副使戊辰中書侍郎兼兵部尚書平章事盧多遜罷爲兵部尚書丁丑西京留守秦王廷美罷歸第復其子德恭德隆名皇姪女韓氏婦落皇女雲陽公主之號盧多遜褫職流崖州并徙其家碁周以上親悉配遠裔庚辰左僕射平章事沈倫罷爲工部尚書禁河南諸州私鑄鉛錫惡錢及輕

小錢是月閏州大水五月辛丑崔彥進敗契丹于唐興
戊申慮囚己酉夏州留後李繼捧獻其銀夏綏宥四州
辛亥三交行營言潘美敗契丹之師于鴈門破其壘三
十六丙辰秦王廷美降封涪陵縣公房州安置以崇化
副使閻彥進知房州監察御史袁廓通判軍州事各賜
白金三百兩己未府州破契丹于新澤砦獲其將校以
下百人是月陝州蝗蕪湖縣雨雹六月乙亥遣使發李
繼捧總麻己上親赴闕其弟繼遷奔地斤澤丙子置譯
經院是月河決臨濟縣漢陽軍大水秋七月甲午以子
德崇爲檢校太保同平章事封衛王德明爲檢校太保

同平章事封廣平郡王乙卯工部尚書沈倫以左僕射致仕是月河決范濟口淮水漢水易水皆溢陽穀縣蝗關陝諸州大水八月庚申朔太子太師王溥薨己卯詔川峽諸州官織錦綺鹿胎透背六銖欵正龜殼等悉罷之民間勿禁九月己丑朔西京諸道係籍沙彌令祠部給牒甲寅貴妃孫氏薨邠州蝗冬十月癸亥詔河南吏民不得闌出邊關侵撓畧奪違者論罪有得羊馬生口者還之戊辰幸金明池御龍舟觀習水戰河決武德縣獨臨河民租己卯左諫議大夫叅知政事實偁卒癸卯乾元曆成是月岳州田鼠食稼十一月己酉以李繼捧

爲彰德軍節度使禁民喪葬作樂十二月戊午朔日有食之庚午蜀兩浙諸州太平興國六年以前逋租戊寅高麗國王佺卒其弟治遣使求襲位詔立治爲高麗國王閏月戊子朔豐州與契丹戰破之獲其天德軍節度使蕭太占城國獻馴象丙申狩近郊辛亥詔赦銀夏等州常赦所不原者諸州置農師

八年春正月己卯以東上閤門使王顯爲宣徽南院使酒坊使弭德超爲北院使並兼樞密副使癸未詔令州縣長吏延問高年耆德二月戊子朔日有食之丁酉禁內屬部落私市女口三月庚申以右諫議大夫宋琪爲

叅知政事豐州破契丹兵降三千餘帳癸亥分三司各
置使癸酉幸金明池觀習水戰丙子親試禮部舉人甲
申除福建諸州鹽禁夏四月壬寅班外官戒諭辭壬子
流樞密副使弭德超于瓊州并徙其家乙卯幸樞密使
石熙載第視疾五月丁卯詔作太一宮于都城南黎桓
自稱三使留後遣使來貢并上丁璿讓表詔諭桓送璿
母子赴闕不聽丁亥流威塞軍節度使曹翰于登州乙
亥詔長吏誘致關隴流亡是月河決滑州過澶濮曹濟
東南入于淮相州風雹六月己亥以王顯爲樞密使柴
禹錫爲宣徽南院使兼樞密副使己酉兗州泰山父老

及瑕丘等七縣民詣闕請封禪是月穀洛漚澗溢壞官民舍萬餘區溺死者以萬計鞏縣壞殆盡秋七月辛未叅知政事郭贇罷爲祕書少監庚辰加宋琪刑部尚書以工部尚書李昉叅知政事是月河江漢滹沱及祁之資滄之胡盧雄之易惡池水皆溢爲患八月壬辰以大水故釋死罪以下丁酉山後兩林蠻來貢溪錦敘富四州蠻來附庚戌以樞密使石熙載爲右僕射辛亥增諡法詔軍國政要令叅知政事李昉及樞密院副使一人錄送史館九月癸丑朔占城國獻馴象初置水陸路發運于京師是月睢溢浸田六十里冬十月戊戌改衛王

德崇名元佐廣平郡王德明名元祐德昌名元休德嚴
名元儁德和名元傑己酉進元佐爲楚王元祐陳王封
元休韓王元儁冀王元傑益王並檢校太保同平章事
司徒兼侍中趙普罷爲武勝軍節度使十一月壬子朔
以叅知政事宋琪李昉並平章事癸丑除川峽民祖父
母父母在別籍異財棄市律己未太一宮成壬申以翰
林學士李穆呂蒙正李至並叅知政事樞密直學士張
齊賢王沔並同簽署樞密院事庚辰置侍讀官十二月
壬午朔詔綏銀夏等州官吏招誘没界外民歸業仍給
復三年丁亥賜河北河東緣邊戍卒襦京城請軍米淮

海國王錢俶三上表乞解兵馬大元帥國王尚書中書
令太師等官罷元帥名餘不許西人寇宥州巡檢使李
謁擊走之是月醴泉縣水中草變爲稻滑州河決

雍熙元年春正月壬子朔不受朝羣臣詣閣拜表稱賀
戊午右僕射石熙載薨壬戌購逸書丁卯涪陵縣公廷
美薨追封涪陵王壬申蠲諸州民去年官所貸粟癸酉
左諫議大夫叅知政事李穆卒三月丁巳滑州河決旣
塞帝作平河歌賜近臣蠲水所及州縣今年租癸未以
涪陵王子德恭德隆爲刺史壻韓崇業爲靜難軍司馬
是月甘露降太一宮庭夏四月乙酉泰山父老詣闕請

封禪戊子羣臣表請凡三上許之甲午幸金明池觀習
水戰因幸講武臺觀射賜武士帛五月庚戌朔除江南
鹽禁辛亥幸城南觀麥賜刈者錢帛罷諸州農師壬子
西州回鶻與波斯外道來貢丁丑乾元文明二殿災己
卯以京官充堂後官六月丁亥詔求直言己丑遣使按
察兩浙淮南西川廣南獄訟鎮安軍節度使守中書令
石守信薨庚子令諸州長吏十日一慮囚壬寅詔罷封
泰山甲辰禁邊臣境外種蒔秋七月壬子改乾元殿爲
朝元殿文明殿爲文德殿丹鳳門爲乾元門改匭院爲
登聞鼓院東延恩匭爲崇仁檢院南招諫匭爲思諫檢

院西申寃匭爲申明檢院北通玄匭爲招賢檢院八月
丁酉親祠太一宮壬寅河水溢是月淄州大水九月壬
戌羣臣表三上尊號曰應運統天睿文英武大聖至仁
明德廣孝皇帝不許宰相叩頭固請終不許丙寅幸並
河新倉冬十月甲申賜華山隱士陳搏號希夷先生夏
州言掩擊李繼遷獲其母妻俘千四百餘帳繼遷走壬
辰禁布帛不中度者癸巳嵐州獻牝獸一角并瑞物六
十三種圖付史館戊戌忠州錄事叅軍卜元幹坐受賂
枉法杖殺之十一月壬子高麗國王遣使來貢丁巳祀
天地于園丘大赦改元中外文武官進秩有差癸酉以

浦城童子楊億爲祕書省正字十二月庚辰淮海國王
錢俶徙封漢南國王癸未賜京畿高年帛丁亥罷嶺南
採珠場壬辰立德妃李氏爲皇后丙申御乾元門賜京
師大酺三日戊戌大雨雪

宋史卷四

宋史卷五

元中書右丞相總裁脫脫等修

本紀第五

太宗二

二年春正月丙辰以德恭爲左武衛大將軍判濟州封
定安侯德隆爲右武衛大將軍判沂州封長靈侯右補
闕劉蒙叟通判濟州起居舍人韓儉通判沂州乙丑賜
德恭德隆常奉外支錢三百萬二月戊寅權交州留後
黎桓遣使來貢乙未夏州李繼遷誘殺汝州團練使曹
光實己亥占城遣使來貢三月己未親試禮部舉人江

南民饑許渡江自占夏四月乙亥朔遣使行江南諸州
振饑民及察官吏能否戊寅遣忠武軍節度使潘美復
屯三交口己卯詔以帝所生官舍作啓聖院己丑殿前
承旨王著坐監資州兵爲姦賊棄市庚子甘露降後苑
辛丑夏州行營破西蕃息利族斬其代州刺史折羅遇
并弟埋乞又破保洗兩族降五十餘族五月甲子幸城
南觀麥賜田夫布帛天長軍蝮生六月甲戌朔河西行
營言獲岌羅賦等十四族焚千餘帳戊子復禁鹽榷酤
秋七月庚申詔諸道轉運使及長吏宜乘豐儲廩以防
水旱八月癸酉朔遣使按問兩浙荆湖福建江南東西

路淮南諸州刑獄仍察官吏勤惰以聞癸巳西南奉化
王子以慈來貢是月瀛莫二州大水九月丙午以歲無
兵凶除十惡官吏犯贓謀故劫殺外死罪減降流以下
釋之及蠲江浙諸州民逋租庚戌重九賜近臣飲于李
昉第召諸王節度使宴射苑中是夕楚王宮火辛亥廢
楚王元佐爲庶人均州安置丁巳羣臣請留元佐養疾
京師許之己未西南蕃王遣使來貢己巳禁海賈閏月
癸未太白入南斗甲申幸天駟監賜從臣馬乙未禁邕
管殺人祭鬼及僧人置妻孥己亥均州獻一角獸冬十
月辛丑朔慮囚丙午以天竺僧天息災施護法天並爲

朝請大夫試鴻臚少卿己酉汴河主糧胥吏坐奪漕軍口糧斷腕徇于河畔三日斬之甲寅黎邛部蠻王子來貢十一月壬午狩于近郊以所獲獻太廟著爲令戊子禱雪辛卯詔在官丁父母憂者並放離任十二月庚子朔日有食之癸卯南康軍言雪降三尺大江冰合可勝重載丁未遣中使賜緣邊戍卒襦袴丙辰門下侍郎兼刑部尚書平章事宋琪罷守本官

三年春正月辛未右武衛大將軍長寧侯德隆薨以其弟德彝嗣侯仍知沂州庚辰夜漏一刻北方有赤氣如城至明不散己丑知雄州賀令圖等請伐契丹取燕薊

故地庚寅北伐以天平軍節度使曹彬爲幽州道行營前軍馬步水陸都部署河陽三城節度使崔彥進副之侍衛馬軍都指揮使彰化軍節度使米信爲西北道都部署沙州觀察使杜彥圭副之以其衆出雄州侍衛步軍都指揮使靜難軍節度使田重進爲定州路都部署出飛狐戍戍叅知政事李至罷爲禮部侍郎二月壬子以檢校太師忠武軍節度使潘美爲雲應朔等州都部署雲州觀察使楊業副之出鴈門三月癸酉曹彬與契丹兵戰固安南克其城丁丑田重進戰飛狐北又破之潘美自西陁入與契丹兵遇追至寰州執其刺史趙彥

辛辛以城降辛巳曹彬克涿州潘美圍朔州其節度副使趙希贊以城降癸未田重進戰飛狐北獲其西南面招安使大鵬翼康州刺史馬頹馬軍指揮使何萬通乙酉曹彬敗契丹于涿州南殺其相賀斯丁亥潘美師至應州其節度副使艾正觀察判官宋雄以城降司門員外郎王延範與祕書丞陸坦戎城縣主簿田辯術士劉昂坐謀不軌棄市庚寅武寧軍節度使同平章事岐國公陳洪進卒辛卯田重進攻飛狐其守將呂行德張繼從劉知進等舉城降以其縣爲飛狐軍占城國遣使來貢丙申進圍靈丘其守將穆超以城降夏四月辛丑潘

美克雲州田重進戰飛狐北破其衆壬寅曹彬米信戰
新城東北又破之己酉田重進再戰飛狐北再破之殺
二將乙卯重進至蔚州其牙校李存璋許彥欽殺大將
蕭嘏理執其監城使同州節度使耿紹忠以城降五月
庚午曹彬之師大敗于岐溝關收衆夜渡拒馬河退屯
易州知幽州行府事劉保勳死之丙子召曹彬崔彥進
米信歸闕命田重進屯定州潘美還代州徙雲應寰朔
吏民及吐渾部族分置河東京西會契丹十萬衆復陷
寰州楊業護送遷民遇之苦戰力盡爲所禽守節而死
六月戊戌朔日有食之甲辰以御史中丞辛仲甫爲叅

知政事秋七月庚午貶曹彬爲右驍衛上將軍崔彥進
爲右武衛上將軍米信爲右屯衛上將軍杜彥圭爲均
州團練使應羣臣列校死事及陷敵者錄其子孫壬午
徙山後降民至河南府許汝等州丁亥以簽署樞密院
事張齊賢爲給事中知代州癸巳階州福津縣有大山
飛來自龍帝峽壅江水逆流壞民田數百里甲午詔改
陳王元祐爲元僖韓王元休爲元侃冀王元儁爲元份
八月丁酉朔以王沔張宏並爲樞密副使丁未大雨遣
使禱岳瀆至夕雨止劔州民饑遣使振之因督捕諸州
盜賊辛亥降潘美爲檢校太保贈楊業太尉大同軍節

度使九月丙寅朔減兩京諸州繫囚流以下一等杖罪
釋之賜所徙寰應蔚等州民米昇宣等十四州雍熙二
年官所振貸並蠲之戊寅賜北征軍士陣亡者家三月
糧冬十月甲辰以陳王元僖爲開封尹壬子高麗國王
遣使來貢庚申詔以權靜海軍留後黎桓爲本軍節度
十一月丙戌幸建隆觀相國寺祈雪十二月乙未朔大
雨雪宴羣臣玉華殿己亥定州田重進入契丹界攻下
岐溝關壬寅契丹敗劉廷讓軍於君子館執先鋒將賀
令圖高陽關部署楊重進死之壬子建房州爲保康軍
以右衛上將軍劉繼元爲節度使代州副部署盧漢贇

敗契丹于土鐙堡斬獲甚衆殺監軍舍利二人是歲壽州大水濮州蝗

四年春正月甲子朔不受朝羣臣詣閣拜表稱賀己卯遣使按問西川嶺南江浙等路刑獄丙戌詔應行營將士戰敗潰散者並釋不問緣邊城堡備禦有勞可紀者所在以聞瘞暴骸死事者廩給其家錄死事文武官子孫蠲河北雍熙三年以前逋租敵所蹂踐者給復三年軍所過二年餘一年二月丙申以漢南國王錢俶爲武勝軍節度使徙封南陽國王丁酉繕治河北諸州軍城隍甲寅錢俶改封許王三月庚辰詔申嚴考績夏四月

癸巳朔以御史中丞趙昌言爲右諫議大夫樞密副使
乙未詔諸州郡暑月五日一滌囹圄給飲漿病者令醫
治小罪卽決之丁未幸金明池觀水嬉遂習射瓊林苑
登樓擲金錢繒綵於樓下縱民取之併水陸發運爲一
司五月丙寅遣使市諸道民馬庚辰改殿前司曰騎爲
捧日驍猛爲拱辰雄勇爲神勇上鐵林爲殿前司虎翼
腰弩爲神射侍衛步軍司鐵林爲侍衛司虎翼丁亥詔
諸州送醫術人校業太醫署賜諸將陣圖六月丁酉以
右驍衛上將軍劉廷讓爲雄州都部署戊戌以彰國軍
節度使駙馬都尉王承衍爲具翼都部署郭守文及郢

州團練使田欽祚並爲北面排陣使庚子定國軍節度使崔翰復爲高陽關兵馬都部署是月鄜州獻馬前足如牛秋七月丙寅幸講武池觀魚是月置三班院八月庚子免諸州吏所逋京倉米二十六萬七千石九月癸亥校醫術人優者爲翰林學生冬十月丙午流雄州都部署劉廷讓于商州壬子左僕射致仕沈倫薨十一月庚辰詔以實數給百官奉十二月壬寅幸建隆觀相國寺祈雪庚戌畋近郊丁巳大雨雪

端拱元年春正月己未朔不受朝羣臣詣閣拜表稱賀乙亥親耕藉田還御丹鳳樓大赦改元除十惡官吏犯

賊至殺人者不赦外民年七十以上賜爵一級癸未幸
玉津園習射乙酉禁用酷刑是月澶州黃河清二月乙
未改左右補闕爲左右司諫左右拾遺爲左右正言丙
申禁諸州獻珍禽奇獸己亥詔瀛州民爲敵所侵暴者
賜三年租復其役五年庚子以藉田開封尹陳王元僖
進封許王元侃襄王元份越王錢俶鄧王中書門下平
章事李昉爲尚書右僕射叅知政事呂蒙正同中書門
下平章事樞密使王顯加檢校太傅給事中許國公趙
普守太保兼侍中叅知政事辛仲甫加戶部侍郎樞密
副使趙昌言加工部侍郎樞密副使王沔爲叅知政事

御史中丞張宏爲樞密副使餘內外並加恩甲辰升建
州爲建寧軍節度庚戌以子元偓爲左衛上將軍徐國
公元偁爲右衛上將軍涇國公三月甲戌貶樞密副使
趙昌言爲崇信軍行軍司馬乙亥鄭州團練使侯莫陳
利用坐不法配商州禁錮尋賜死癸未幸玉津園習射
廢水陸發運司夏四月丁亥賜京城高年帛己丑加高
麗國王治靜海軍節度使黎桓並檢校太尉五月辛酉
置祕閣于崇文院辛未感德軍節度使李繼捧賜姓趙
氏名保忠壬申以保忠爲定難軍節度使閏五月辛卯
以洛州防禦使劉福爲高陽關兵馬都部署濮州防禦

使楊贊爲貝州兵馬都部署乙未賜諸州高年爵公士
丁酉交州黎桓遣使來貢壬寅親試禮部進士及下第
舉人六月丙辰朔右領軍衛大將軍陳廷山謀反伏誅
丁丑改湖南節度爲武安軍節度親試進士諸科舉人
秋七月丙午除西川諸州鹽禁辛亥忠武軍節度使潘
美知鎮州八月乙卯壽星見丙地甲子以宣徽南院使
郭守文爲鎮州路都部署戊寅太師鄧王錢俶薨追封
秦國王諡忠懿庚辰幸太學命博士李覺講易賜帛遂
幸玉津園習射是月鳳凰集廣州清遠縣解合歡樹樹
下生芝三莖九月乙酉朔以侍衛馬軍都指揮使李繼

隆爲定州都部署冬十月壬午以侍衛步軍都指揮使戴興爲澶州都部署癸未詔罷游獵五方所畜鷹犬並放之諸州毋以爲獻十一月甲申朔高麗王遣使來貢己丑郭守文破契丹于唐河十二月辛未以夏州蕃落使李繼遷爲銀州刺史充洛苑使

二年春正月癸未朔不受朝羣臣詣閣拜表稱賀壬辰以涪州觀察使柴禹錫爲澶州兵馬部署癸巳詔議北伐二月壬子朔令河北東西路招置營田癸丑詔錄將校官吏功及死事使臣官吏子孫士卒廩給其家三月平塞天威平定威虜靜戎保塞寧邊等軍祁易保定鎮

邢趙等州民除雍熙四年正月丙戌詔給復外更給復
二年霸代洛雄莫深等州平虜岢嵐軍更給復一年戊
午罷乘傳銀牌復給樞密院牒以太倉粟貸京畿饑民
癸亥作方田戊辰以國子監爲國子學三月辛卯命高
瓊爲并代都部署壬寅親試禮部舉人夏四月丁巳置
富順監辛未幸趙普第視疾五月戊戌以旱慮囚遣使
決諸道獄是夕雨秋七月甲申以知代州張齊賢爲刑
部侍郎樞密副使鹽鐵使張遜爲宣徽北院使簽署樞
密院事戊子有彗出東井上避正殿減常膳辛丑契丹
犯威虜軍崇儀使尹繼倫擊破之殺其相皮室大將于

越遁去八月丙辰大赦是夕彗不見癸亥詔作開寶寺舍利塔成九月壬午邛部川山後百蠻來貢冬十月辛未以定難軍節度使趙保忠同平章事以歲旱彗星謫見詔曰朕以身爲犧牲焚於烈火亦未足以荅謝天譴當與卿等審刑政之闕失稼穡之艱難恤物安人以祈立祐十二月辛亥置三司都磨勘官丙辰大雨雪庚申詔令四方所上表祇稱皇帝羣臣請復尊號不許辛酉上法天崇道文武皇帝詔去文武二字餘許之三佛齊國遣使來貢

淳化元年春正月戊寅朔減京畿繫囚流罪以下一等

改元內外文武官並加勳階爵邑中書舍人大將軍以
上各賜一子官賜鰥寡孤獨錢除逋負受尊號改乾明
節爲壽寧節戊子詔作清心殿二月丁未朔除江南兩
浙淮西嶺南諸州漁禁己酉改大明殿爲含光殿三月
丙子朔乙未幸西京留守趙普第視疾夏四月庚戌遣
中使詣五嶽禱雨慮囚遣使分決諸道獄甲寅詔尚書
省四品兩省五品以上舉轉運使及知州通判五溪蠻
田漢權來附戊午建婺州爲保寧軍節度丙寅命殿前
副都指揮使戴興爲鎮州都部署五月甲午給致仕官
半奉辛卯置詳覆推勘官六月丙午罷中元下元張燈

庚午太白晝見秋七月丁丑太白復見是月吉洪江蘄
河陽隴城大水開封陳留封丘酸棗鄆陵旱賜今年田
租之半開封特給復一年京師貴糴遣使開廩減價分
糶八月乙巳毀左藏庫金銀器皿己巳禁川峽嶺南湖
南殺人祀鬼州縣察捕募告者賞之庚午西南蕃主使
其子龍漢興來貢是月京兆長安八縣旱賜今年租十
之六蜀舒州宿松等三處魚池稅九月辛巳熒惑入太
微垣大宴崇政殿禁川峽民父母在出爲贅壻是月蜀
滄單汝三州今年租十之六冬十月甲辰交州黎桓遣
使來貢乙巳熒惑陵左執法乙丑知白州蔣元振知須

城縣姓益恭並以清幹聞下詔褒諭賜粟帛是月以乾
鄭二州河南壽安等十四縣旱州蠲今年租十之四縣
蠲其稅十一月戊戌太白晝見是月蠲大名府管內今
年租十之七十二月乙巳占城遣使來貢乙卯高麗國
遣使來貢辛酉詔中外所上書疏及面奏制可者並下
中書樞密三司中覆頒行是歲洪吉江蘄諸州水河陽
大水曹單二州有蝗不爲災開封大名單內及許滄單
汝乾鄭等州壽安長安天興等二十七縣旱深冀二州
文登牟平兩縣饑

二年春正月壬申朔不受朝羣臣詣閣拜表稱賀丙子

遣商州團練使翟守素帥兵援趙保忠于夏州乙酉置
內殿崇班左右侍禁改殿前承旨爲三班奉職丙戌熒
惑犯房己丑詔陝西諸州長吏設法招誘流亡復業者
計口貸粟仍給復二年二月癸丑盡易宮殿彩繪以楮
聖監察御史祖吉坐知晉州日爲姦賊棄市乙丑斬夔
州亂卒謝榮等百餘人於市閏月辛未朔日有食之戊
寅禱雨丁亥詔內外諸軍除木槍弓弩矢外不得蓄他
兵器己丑詔京城蒲博者開封府捕之犯者斬命近臣
兼差遣院流內銓是月河水溢鄆城縣蝗汴河決三月
乙卯幸金明池御龍舟遂幸瓊林苑宴射己巳以歲蝗

旱禱雨弗應手詔宰相呂蒙正等朕將自焚以荅天譴
翌日而雨蝗盡死夏四月庚午罷端州貢硯辛巳以張
齊賢陳恕並參知政事張遜兼樞密副使溫仲舒寇準
並爲樞密副使是月河水溢虞鄉等七縣民饑五月己
亥朔詔減兩京諸州繫囚流以下一等杖罪釋之庚子
置諸路提點刑獄官丙辰左正言謝泌以敢言擢右司
諫賜金紫錢三十萬六月甲戌忠武軍節度使同平章
事潘美卒命張永德爲并代都部署乙酉以汴水決浚
儀縣帝親督衛士塞之庚寅禁陝西緣邊諸州闌出生
口是月楚丘鄆城淄川三縣蝗河水汴水溢秋七月己

亥詔陝西緣邊諸州饑民鬻男女入近界部落者官贖之李繼遷奉表請降以爲銀州觀察使賜國姓改名保吉是月乾寧軍蝗許雄嘉三州大水八月己卯置審刑院己丑雅州言登遼山崩九月丁酉朔戶部侍郎參知政事王沔給事中參知政事陳恕並罷守本官己亥中書侍郎兼戶部尚書平章事呂蒙正罷爲吏部尚書以右僕射李昉參知政事張齊賢並平章事翰林學士賈黃中李沆並爲給事中參知政事帝飛白書玉堂之署四字以賜翰林承旨蘇易簡壬寅邛部川蠻來貢癸卯罷樞密使王顯爲崇信軍節度使甲辰以張遜知樞密

院事溫仲舒寇準同知院事十一月丙申朔復百官次對乙巳罷京城內外力役土功己酉幸建隆觀相國寺祈雪十二月丙寅朔行入閣儀乙亥賜秦州童子譚孺卿本科出身癸未保康軍節度使劉繼元卒追封彭城郡王大雨無冰是歲女真表請伐契丹詔不許自是遂屬契丹大名河中絳濮陝曹濟同淄單德徐晉輝磁博汝兗號汾鄭亳慶許齊濱棣沂貝衛青霸等州旱

三年春正月癸卯大雨雪乙巳詔常參官舉可任升朝官者丙午詔宰相侍從舉可任轉運使者二月乙丑朔日有食之三月乙未朔以趙普爲太師封魏國公戊戌

親試禮部舉人辛丑親試諸科舉人戊午以高麗賓貢
進士四十人並爲祕書省祕書郎遣還庚申帝幸金明
池觀水戲縱京城觀者賜高年白金器皿夏四月丁丑
詔江南兩浙荆湖吏民之配嶺南者還本郡禁錮癸未
上作刑政稼穡詩賜近臣五月甲午朔御文德殿百官
入閣壬寅詔御史府所斷徒罪以上獄具令尚書丞郎
兩省給舍一人慮問丁未戶部郎中田錫通判殿中丞
郭渭坐稽留刑獄並責州團練副使不簽署州事戊申
詔太醫署良醫視京城病者賜錢五十萬具藥中黃門
一人按視之己酉以旱遣使分行諸路決獄是夕雨辛

亥置理檢司甲寅詔作祕閣六月丁丑大風晝晦京師
疫解戊寅慮囚甲申飛蝗自東北來蔽天經西南而去
是夕大雨蝗盡死庚寅以殿前都虞候王昭遠爲并代
兵馬都部署辛卯置常平倉秋七月己酉太師魏國公
趙普薨追封真定王是月許汝兗單滄蔡齊貝八州蝗
洛水溢八月戊辰以祕閣成賜近臣宴壬申召終南山
隱士种放不至庚辰闍婆國遣使來貢丁丑釋嶺南東
西路罰作荷校者九月丙申遣官祈晴京城諸寺觀甲
寅幸天駟監賜從臣馬乙卯羣臣上尊號曰法天崇道
明聖仁孝文武皇帝凡五表終不許冬十月辛酉朔折

御卿進白花鷹放之詔勿復獻戊寅始置京朝幕職州
縣官考課并校三班殿最戊子高麗西南蕃皆遣使來
貢十一月己亥許王元僖薨甲申慮囚降徒流以下一
等釋杖罪趙保忠貢鵲號海東青還之己未禁兩浙諸
州巫師置三司主轄收支官是月蔡州建安大火十二
月丁卯大雨雪己卯占城國王楊陀排遣使來貢是月
雄州言大火是歲潤州丹徒縣饑死者三百戶

四年春正月庚寅朔享太室羣臣詣齊宮拜表稱賀辛
卯祀天地于園丘以宣祖太祖配大赦乙未大雨雪高
麗國遣使來貢乙巳藏才西族首領羅妹以良馬來獻

二月己未朔日有食之壬戌召賜京城高年帛百歲者一人加賜塗金帶是日雨雪大寒再遣中使賜孤老貧窮人千錢米炭置昭宣使癸亥廢沿江榷貨八務乙丑加高麗國王王治檢校太師靜海軍節度使黎桓封交趾郡王己卯詔以江浙淮陝饑遣使巡撫詔分遣近臣巡撫諸道有可惠民者得便宜行事吏罷軟苛刻者上之詔令有未便者附傳以聞丙戌置審官院考課院永康軍青城縣民王小波聚徒爲寇殺眉州彭山縣令齊元振是月商州大雨雪三月壬子詔權停貢舉四月己卯諸司奉行公事不得輒稱聖旨五月戊申罷鹽鐵戶

部度支等使置三司使六月戊午朔詔中丞已下皆親
臨鞠獄丙寅吏部侍郎平章事張齊賢罷爲尚書左丞
壬申宣徽北院使知樞密院事張遜貶右領軍衛將軍
右諫議大夫同知院事寇準罷守本官以涪州觀察使
柴禹錫爲宣徽北院使知樞密院事樞密直學士呂端
參知政事劉昌言同知樞密院事戊寅初復給事中封
駁七月丁酉大雨戊戌復沿江務置諸路茶鹽制置使
八月丙辰朔日有食之癸酉以向敏中張詠始同知銀
臺通進司視章奏案牘以稽出入九月丙申詔諸雜除
禁錮人州縣有闕得次補以責効能自新勤幹者具聞

再敘乙巳以給事中封駁隸銀臺通進司丙午命侍從
舉任才堪五千戶以上縣令者二人自七月雨至是不
止是月河水溢壞澶州江溢陷涪州詔溺死者給斂具
澶人千錢涪人鐵錢三千仍發廩以振冬十月壬戌罷
諸路提點刑獄司庚午始分天下州縣爲十道兩京爲
左右計各署判官領之置三司使二員辛未右僕射平
章事李昉給事中參知政事賈黃中李沆左諫議大夫
知樞密院事溫仲舒並罷守本官以吏部尚書呂蒙正
平章事翰林學士蘇易簡爲給事中參知政事樞密都
承旨趙鎔爲宣徽北院使樞密直學士向敏中爲右諫

議大夫並同知樞密院事丁丑以右諫議大夫趙昌言
爲給事中參知政事辛巳遣使按行畿縣民田被水者
蠲其租是月河決澶州西北流入御河閏月辛卯幸水
碓觀魚己酉置三司總計度使十一月丁巳萬安州獻
六眸龜癸酉還隴西州所獻白鷹十二月辛丑大雨雪
戊申西川都巡檢使張玘與王小波戰江原縣死之小
波中流矢死衆推其黨李順爲帥

五年春正月甲寅朔不受朝羣臣詣閣拜表稱賀戊午
李順陷濮州己未陷彭州乙丑慮囚流罪以下釋之己
巳李順陷成都知府郭載奔梓州順入據之賊兵四出

攻劫州縣遣使振宋亳陳潁州饑民別遣決諸路刑獄
應因饑劫藏粟誅爲首者餘減死癸酉以侍衛馬軍都
指揮使李繼隆爲河西行營都部署討李繼遷甲戌命
昭宣使王繼恩爲兩川招安使討李順詔諸州能出粟
貸饑民者賜爵辛巳詔除兩京諸州淳化二年逋負二
月乙未李順分攻劔州都監西京作坊副使上官正成
都監軍供奉官宿翰合擊大破之斬馘殆盡丙午幸南
御莊觀稼己酉以益王元傑爲淮南鎮江等軍節度使
徙封吳王辛亥詔除劔南東西川峽路諸州主吏民卒
淳化五年以前逋負三月乙亥趙保忠爲趙保吉所襲

奔還夏州指揮使趙光嗣執之以獻李繼隆帥師入夏州交阯郡王黎桓遣使來貢夏四月壬午朔詔除天下主吏逋負甲申削趙保吉所賜姓名丙戌置起居院初復起居注以國子學復爲國子監辛卯慮囚大食國王遣使來貢戊戌赦諸州除十惡故劫殺官吏犯正賊外降死罪以下囚己亥王繼恩帥師過綿州賊潰走追殺及溺死者甚衆庚子復綿州內殿崇班曹習破賊于老溪復闡州綿州巡檢使胡正遠帥兵進擊復巴州壬寅西川行營擊賊于研口砦破之復劍州癸卯大雨五月丁巳西川行營破賊十萬衆斬首三萬級復成都獲賊

李順其黨張餘復攻陷嘉戎瀘渝涪忠萬開八州開州
監軍秦傳序死之丙寅河西行營送趙保忠至闕下釋
其罪授右千牛衛上將軍封宥罪侯己巳以知梓州張
雍都巡檢使盧斌嘗堅守却賊斌進擊解閬州圍遂平
蓬州雍加給事中斌領成州刺史以少府監雷有終爲
諫議大夫知成都府庚午賊攻夔州峽路都大巡檢白
繼贊夔州巡檢使解守顥大敗其衆于西津口斬首二
萬級獲舟千餘艘辛未降成都府爲益州壬申右僕射
李昉以司空致仕甲戌詔利州興元府洋州西縣民並
給復一年丙子磔李順黨八人于鳳翔市庚辰初伏帝

親書綾扇賜近臣六月辛卯詔赦李順脅從註誤是月
都城大疫分遣醫官煮藥給病者賊攻施州指揮使黃
希遜擊走之戊戌陝路行營破賊于廣安軍又破賊張
罕二萬衆于嘉陵江口又破于合州西方溪俘斬甚衆
戊申以侍衛步軍都指揮使高瓊爲鎮州都部署賊攻
陵州知州張旦擊破之高麗遣使以契丹來侵乞師秋
七月辛亥朔賊攻眉州知州李簡等堅守踰月賊引去
癸亥置江淮兩浙發運使丙寅除兩浙諸州民錢俶日
逋負甲戌置威塞軍乙亥李繼遷遣使來貢八月甲申
詔有司講求大射儀注癸巳以內班爲黃門甲午置宣

政使以宦者昭宣使王繼恩爲之乙未詔釋劔南峽路諸州亡命戍戍以通遠軍復爲環州置清遠軍庚子大雨貝州言驍捷卒劫庫兵爲亂推都虞候趙咸雍爲帥轉運使王嗣宗率屯兵擊敗之擒咸雍磔于市辛丑詔遣知益州張詠赴部得便宜從事癸卯以參知政事趙昌言爲西川峽路招安馬步軍都部署尋詔昌言駐鳳翔遣內侍押班衛紹欽往行營指揮軍事峽路行營破賊帥張餘復雲安軍李繼遷使其弟奉表待罪九月庚戌朔戶部尚書辛仲甫以太子少保致仕甲寅賜三司錢百萬募能言司事之利便者量事賞之盡則再給以

備賞已未罷諸州權酤改黃門院爲內侍省以黃門班院爲內侍省內侍班院入內黃門班院爲內侍省入內侍班院辛酉遣使分行宋毫陳潁泗壽鄧蔡等州按行民田被水及種蒔不及者並蠲其租壬申以襄王元侃爲開封尹改封壽王大赦除十惡故謀劫鬪殺官吏犯正賊外諸官先犯賊罪配隸禁錮者放還乙亥以左諫議大夫寇準參知政事丁丑以蜀部漸平下詔罪己戊寅西川行營言衛紹欽破賊于學射山別將楊瓊復蜀州曹習等又破賊于安國鎮誅其帥馬太保冬十月庚辰詔釋殿前司逃軍親屬之禁錮者西川行營指揮使

張麟殺其將王文壽以叛遣使招撫其衆遂共斬麟首
以降乙未楊瓊等復邛州乙巳改青州平盧軍爲鎮海
軍杭州鎮海軍爲寧海軍十一月庚戌遣使諭李繼遷
賜以器幣茶藥衣服丙辰賜近臣飛白書庚申詔江南
西路及荆湖南北路嶺南溪洞接連及蕃商外國使誘
子女出境者捕之癸亥賊攻眉州崇儀使宿翰等擊敗
之斬其僞中書令吳蘊丙寅幸國子監賜直講孫奭緋
魚因幸武成王廟復幸國子監令奭講尚書賜以束帛
大寒賜禁衛諸軍緡錢有差十二月戊寅朔日當食雲
陰不見辛巳命樞密直學士張鑑西京作坊副使馮守

規安撫西川丙戌命諸王畋近郊弛忠靖二州刑徒庚寅宿翰等引兵趨嘉州僞知州王文操以城降乙未祕書丞張樞坐知榮州降賊棄市辛丑以三司兩京十道復歸三部各置使一員每部置判官推官都監分勾院爲三

至道元年正月戊申朔改元赦京畿繫囚流罪以下遞降一等杖罪釋之蠲諸州逋租蠲陝西諸州去年秋稅之半丙辰詔作上清宮成丁巳涼州吐蕃當專以良馬來獻戊午占城國王楊陀排遣使來貢辛酉上御乾元門觀燈癸亥契丹大將韓德威誘党項勒浪嵬族自振

武犯邊永安節度使折御卿邀擊敗之于子河汭勒浪等乘亂反擊德威遂殺其將突厥大尉司徒舍利等獲吐渾首領一人德威僅以身免戊辰以翰林學士錢若水爲右諫議大夫同知樞密院事樞密副使劉昌言罷爲給事中以宣祖舊第作洞真宮成甲戌李繼遷遣使以良馬橐駝來貢二月甲申命宰相禱雨令川峽諸州瘞暴骸戊戌以旱慮囚減流罪以下丙午雨嘉州函賊帥張餘首送西川行營餘黨悉平蠲襄唐均汝隨鄧歸峽等州去年逋租振亳州房州光化軍饑遣使貸之三月庚申詔求直言辛酉以會州觀察使知清遠軍田紹

斌爲靈州兵馬都部署己巳廢邵武軍歸化縣金坑夏
四月癸未吏部尚書平章事呂蒙正罷爲右僕射以參
知政事呂端爲戶部侍郎平章事宣徽北院使知樞密
院事柴禹錫罷爲鎮寧軍節度使參知政事蘇易簡爲
禮部侍郎以翰林學士張洎爲給事中參知政事甲申
以宣徽北院使同知樞密院事趙鎔知樞密院事乙酉
契丹犯雄州知州何承矩擊敗之斬其鐵林大將一人
辛丑遣使分決諸路刑獄劫賊止誅首惡降流罪以下
一等壬寅慮囚甲辰大雨雷電開寶皇后宋氏崩六月
乙酉購求圖書丙戌遣使諭李繼遷授以鄜州節度使

繼遷不奉詔丁亥以銀州左都押衙張浦爲銀青光祿大夫檢校工部尚書鄭州刺史兼御史大夫充本州團練使己亥許士庶工商服紫是月大熱民有暍死者秋七月丙寅除陳許等九州及光化軍今年夏稅八月壬辰詔立壽王元侃爲皇太子改名恒兼判開封府大赦文武常參官子爲父後見任官者賜勳一轉癸巳以尚書左丞李至禮部侍郎李沆並兼太子賓客癸卯禁西北緣邊諸州民與內屬戎人昏娶九月丙午西南蕃牂牁諸蠻來貢詔封西南蕃主龍漢瑋爲歸化王丁卯御朝元殿冊皇太子庚午清遠軍言李繼遷入寇率兵擊

走之冬十月甲戌朔皇太子讓宮僚稱臣許之乙丑陝西轉運使鄭文寶坐撓邊責授藍田縣令十一月己未閱武便殿是月以峯州團練使上官正右諫議大夫雷有終並爲西川招安使召王繼恩歸闕十二月甲戌羣臣奉表加上尊號曰法天崇道上聖至仁皇帝凡五上不許契丹犯邊折御卿率兵禦之卒于師斬馬步軍都軍頭孫贊于軍中庚辰新渾儀成

二年春正月辛亥祀天地于圜丘大赦中外文武加恩丁卯廢諸州司理判官二月壬申朔司空致仕李昉薨戊寅以越王元份爲杭州大都督兼領越州吳王元傑

爲揚州大都督兼領壽州己卯以徐國公元偓爲洪州
都督鎮南軍節度使涇國公元偁爲鄂州都督武清軍
節度使庚辰以御史中丞李昌齡爲給事中參知政事
辛巳以呂蒙正爲左僕射宋琪爲右僕射乙未定任子
官制三月丙寅以京師旱遣中使禱雨戊辰命宰臣祀
郊廟社稷禱雨夏四月甲戌命侍衛馬軍都指揮使李
繼隆爲環慶等州都部署殿前都虞候范廷召副之討
李繼遷癸未雨五月癸卯李繼遷寇靈州六月戊戌黔
州言蠻寇鹽井巡檢使王惟節戰死是月亳州蝗秋七
月己亥朔命殿前都指揮使王超爲夏綏麟府州都部

署庚子詔作壽寧觀成丙寅給事中參知政事寇準罷
守本官戊辰蠲峽路諸州民去年逋租是月汴水決穀
熟縣許宿齊三州蝗抱草死閏月庚寅詔江浙福建民
負人錢没入男女者還其家敢匿者有罪八月辛丑密
州言蝗不爲災九月戊寅右僕射宋琪薨詔川峽諸州
民家先藏兵器者限百日悉送官匿不以聞者斬己卯
夏州延州行營言破李繼遷於烏白池獲未募軍主吃
囉指揮使等二十七人繼遷遁甲申會州觀察使環慶
副都部署田紹斌貶右監門衛率府副率虢州安置丙
戌秦晉諸州地晝夜十二震丙申詔廢衢州治冬十月

己未詔以池州新鑄錢監爲永豐監十一月丁卯朔增
司天新曆爲一百二十甲子戊寅置簽署提點樞密宣
徽院諸房公事辛卯許州羣盜劫郟城縣居民巡檢李
昌習鬪死都巡檢使王正襲擊之獲賊首宋斌及餘黨
皆斬于市甲午禁淮南通行鹽稅十二月命宰相以下
百官詣諸寺觀禱雪甲寅雨雪大有年是歲處州稻再
熟

三年春正月丙子以戶部侍郎溫仲舒禮部侍郎王化
基並參知政事給事中李惟清同知樞密院事參知政
事張洎罷爲刑部侍郎乙酉孝章皇后陪葬永昌陵辛

卯以侍衛馬步軍都虞候傅潛爲延州路都部署殿前
都虞候王昭遠爲靈州路都部署二月丙申朔靈州行
營破李繼遷辛丑帝不豫甲辰降京畿死罪囚流以下
釋之壬戌大食賓同隴國並來貢三月丁卯占城國來
貢壬辰不視朝癸巳退班于萬歲殿宣詔令皇太子柩
前卽位是日崩年五十九在位二十二年殯于殿之西
階羣臣上尊諡曰神功聖德文武皇帝廟號太宗十月
己酉葬永熙陵

贊曰帝沈謀英斷慨然有削平天下之志旣卽大位陳
洪進錢俶相繼納土未幾取太原伐契丹繼有交州西

夏之役干戈不息天災方行俘馘日至而民不知兵水旱螟蝗殆偏天下而民不思亂其故何也帝以慈儉爲寶服澣濯之衣毀奇巧之器却女樂之獻悟畋遊之非絕遠物抑符瑞閔農事考治功講學以求多聞不罪狂悖以勸諫士哀矜惻怛勤以自勵日晏忘食至於欲自焚以荅天譴欲盡除天下之賦以紓民力卒有五兵不試禾稼荐登之效是以青齊耆耄之叟願率子弟治道請登禪者接踵而至君子曰得乎丘民而爲天子帝之謂乎故帝之功德炳煥史牒號稱賢君若夫太祖之崩不踰年而改元涪陵縣公之貶死武功王之自殺宋后

之不成喪則後世不能無議焉

宋史卷五

宋史卷五考證

太宗紀二淳化二年十一月丙申朔復百官次對○

臣

其肅

按玉海待制候對唐制也後唐天成中廢淳化二年詔復百官次對每起居日常參官二人次對閣門受其章

宋史卷五考證